

曾文正公全集

第四函
函六册

庚辰穀雨前一日以爲

靜丞仁兄大人四旬誕辰誌慶

陳寶鋹

弟 關維恭 拜 贈

孟昭寬

曾文正公奏稿

卷之十八目錄

官軍攻克運漕並銅城閘勝仗摺

同治二年正月十二日

謝會貞幹追贈按察使 恩摺

全日

近日軍情片

委署皖南道缺片

鮑超軍大獲勝仗涇縣解圍摺

正月二十七日

涇縣守城陣亡員弁請卹片

近日軍情並陳親赴金陵察看片

代奏李世忠請贖勝保罪摺

全日

查閱沿江各軍並陳近日軍情摺

二月十二日

由金陵回皖沿途查閱並近日軍情摺

二月二十七日

沿途察看軍情賊勢片

祁門知縣唐治建祠片

鮑超軍克甯國近城要隘摺

三月十二日

近日軍情片

李世忠軍營失陷摺

全日

蕪湖金柱關水陸防軍屢勝摺

三月二十七日

保穆其琛補無爲州實缺片

揀調各員畱皖委用摺

全日

近日軍情片

石澗埠六安州廬江等處戰守情形摺

四月十二日

覆陳淮鹽暫難改辦官運摺

全日

近日軍情片

恭謝天恩瀝陳下情摺

四月二十二日

謝會貞幹予謚建祠恩摺

全日

克復東關銅城閘兩隘摺

四月二十七日

近日軍情並陳餉絀情形片

金陵軍攻克石城石壘摺

五月十二日

水陸會克巢含和三城摺

全日

近日軍情片

攻克江浦浦口九洑洲江面一律肅清摺

五月二十七日

近日軍情片

全日

四月二十二日

四月二十二日

官軍攻克運漕並銅城閘勝仗摺

同治二年正月十一日

奏爲官軍攻克運漕鎮後進剿巢縣小挫旋在銅城閘兩次獲勝恭摺馳陳仰祈

聖鑒事竊北岸官軍攻克運漕鎮

臣國藩兩次具陳梗概聲明

續奏戰狀在案嗣據各營稟報僞對王一枝竄聚巢縣分撲西梁山經周惠堂節次督軍勦退後遂踞運漕銅城閘東關各隘偵知無爲州產米最富守兵又單於上年十一月二十四日擁三四千眾撲近州城北門外李昭慶率樹字等營開城迎戰會泗美帶水師右營從新河口橫出擊之適劉連捷亦自金陵來會賊乃負創卻走越數日臣國藩所調之蕭慶衍毛有銘兩軍

先後馳至議以毛有銘所部嚴備巢縣東關之賊蕭慶衍所部專攻運漕銅城閘之賊十二月初九日臣玉麟令右營定湘營師船駛抵運漕上游二里許渡蕭慶衍陸師過河築寨未及盡濟乃該鎮踞賊糾股突出偪營而陣圍裏數重我軍在水次燃礮仰轟仍分舢板數號接渡後濟之軍環起縱擊殲獲頗眾毛有銘正帶馬隊渡黃雒河履勘形勢一聞運漕礮聲飛騎助戰賊知不敵敗遁歸巢初十日我營修築臣玉麟飭曾泗美右營喻俊明定湘營護定陸師向運漕自上攻下親督成發翔左營王吉嚮導營唐敏義澄海營向三汊河自下攻上該處有三石卡一大石壘堅峙街心未易攻取成發翔帶飛划由水路

進王吉帶水勇登陸由北岸進唐敏義帶水勇登陸由南岸進
戰不兩時遂斷浮橋悉焚卡壘賊之攖刃墮河而死者不止數
百人臣玉麟自三汊河引軍西上與曾泗美喻俊明遇乃知大
馬頭一橋二壘亦就毀平蕭慶衍督率馬步等營四面縱火斬
隘直入縱橫鈔殺立復運漕一鎮乘勝躡賊直至黃墩誅斬無
算餘匪歸併銅城聞而去此十二月初十日水陸各軍會克運
漕鎮之情形也運漕既復而後毛有銘率親兵馬隊回駐石澗
埠卽於十三日部勒各營出哨東關見賊對河列陣正與曾泗
美礮划往來拒敵急派湘右營渡河夾擊斬賊二三十級賊仍
縮入卡內連日增黨修濠堅伏不出毛有銘知東關之未可遽

圖也不如徑取巢縣以爲攻心之計二十日就各營中抽撥六
成隊伍越芙蓉嶺迤邐前進突有五千餘賊在前面山岡揚旗
吹角張兩翼鈔來毛有銘隨令信中溥左溥右三營禦左路湘
中湘右二營禦右路兩鋒相交會不少卻乃以馬隊橫掠賊陣
賊始披靡我軍奮力薄賊馳逐一里許正思撤隊回營詎林木
間鼓聲忽起巢縣悍賊蠡擁而來徑鈔信中溥右兩營頃刻合
圍彭星占與諸弁勇左右馳突裹入垓心胡得勝陳東祥謝濟
偁呂鴻榜李春生等力戰死之彭星占憤怒填臆負傷決戰手
刃數賊並歿於陣毛有銘飛飭湘中湘右溥左等營合軍併擊
賊漸解退比見劉義勝匹馬衝入中槍而殞該逆仍復回戈轉

鬪且卻且前各軍以抬礮猛擊殲斃前鋒數百人乘賊隊散亂
爭相駭奔之際遂奪獲彭星占尸骸而還此二十日毛有銘一
軍在芙蓉嶺擊賊小挫之情形也其銅城關一路賊於要衝築
四卡以阻我陸師又築一水卡以阻我舟師蕭慶衍先於十四
日移軍黃墩張家渡旋派營勇平渡口土埂俾利戰船駛擊十
九日臣玉麟飭令喻俊明成發翔王吉唐敏義等攻破水旱諸
卡隨結小划爲橋渡過陸師全隊二十一日蕭慶衍令趙太和
率爲左營郭鵬程率毅右營攻陶家觜第一壘洪致祥率亨中
營胡發達率強右營攻陶家觜第二壘復令朱吉玉率爲右營
蕭恆書率爲前營攻大甲村賊壘仍自率貞中營及劉長槐之

元左營爲各路策應天甫向曙諸道並進賊正欲出壘迎拒我軍已環逼濠邊火器飛擲燃及哨棚眾勇於烈燄中躍過濠溝摩肩而上一壘旣破各壘盡亂駢戮盈千并斬僞安燕福文姓諸酋水師亦分隊連毀沿隄數卡乘勢進取岷山岡逆壘賊皆惶遽失措踰牆欲遁蕭慶衍麾軍直進立焚二壘擒斬尤多遂繞出銅城聞後奮攻石壘尋以賊援麇集相持未下二十二日蕭慶衍派趙太和朱吉玉蕭恆書劉長槐四營於近接該聞之黃龍口地方相度營基分隊移紮又派洪致祥胡發達郭鵬程三營親帶貞中一營整軍以爲之備不移時而聞中羣賊糾合陶家廠關門鎮銅城廟洋獅觜新塘街五顯集百旺市東關各

股分三路來犯蕭慶衍率各營縱兵鈔擊少挫兇鋒中路之賊
敗過閘口左右兩路之賊退聚閘後眾軍乘之賊又從閘後出
兩大股一走閘西堤埂一走岷山岡之東蕭慶衍令蕭恆書朱
吉玉堵住東路潛遣洪致祥郭鵬程趙太和等分伏黃龍口村
內而以劉長槐胡發達等隊赴閘口誘賊賊果輕我兵寡蜂擁
齊出劉長槐胡發達斂軍佯退俟賊撲過村口伏兵突發亂刃
交刺該逆無心接仗衝出重圍維時岡東一股聞風竄遁閘西
一股亦經水師擊走我軍日暮收隊略有損折此二十一二等
日蕭慶衍一軍進攻銅城閘毀壘獲勝之情形也臣等查賊在
巢縣廣聚悍黨距守數隘意在紛竄皖北郡縣冀解金陵之圍

此次克復運漕進規銅城聞苦戰兩日尙屬得手惟蕭慶衍毛有銘兩軍不滿八千人兵單賊眾未能遽期掃蕩現飭諸軍堅守各城隘俟春水稍漲再行水陸會剿恢復要區所有在事出力人員擬請酌保數員附入潁西剿捻案內彙求

恩施外總兵彭星占數年征剿嚴明勇敢艱險不辭臨陣捐軀深堪憫惻應請照總兵立功後陣亡例從優

賜卹都司銜藍翎守備胡得勝藍翎守備劉義勝陳東祥藍翎千總謝濟偁藍翎把總呂鴻榜藍翎外委李春生同時陣亡并

請

勅部各照本職本銜從優議卹所有官軍攻克運漕分道進戰

各緣由謹會同大學士湖廣督臣官文由驛六百里馳奏伏乞
皇太后

皇上聖鑒訓示謹

奏

Blank manuscript page with vertical columns.

Vertical text on the left margin, possibly bleed-through from the reverse side.

謝曾貞幹追贈按察使

恩摺

同治二年正月十二日

奏爲恭謝

天恩仰祈

聖鑒事

竊臣

接准兵部火票遞到同治元年十二月初六日奉

上諭前因知府曾貞幹擊退援賊後降旨詢問該知府紮營何處茲據曾國藩覆奏該知府自五月馳赴江甯大營秋閒邁病適值援賊大至力疾督戰解圍後積勞身故等語曾貞幹自赴江南軍營屢著戰功朝廷早欲擢用因曾國藩再三懇辭擬俟江甯克復後從優獎勵茲以力疾督戰積勞病故悼惜殊深雖未經曾國藩奏請給卹而曾貞幹係效力疆場戰功卓著之員

著卽追贈按察使卽照按察使軍營立功後病故例議卹以示優異欽此跪誦之下感激涕零適值曾貞幹靈櫬經過安慶當卽宣告靈前望

闕叩頭謝

恩訖伏念

臣

弟貞幹秉質愚蒙持躬介特爲諸生時不甚肄習

舉業頗究心搏力技擊之法咸豐三年帶勇六百人隨

臣

勦賊

旋以

臣

父年老回籍侍親八年十月因胞兄國華殉難三河蒙

文宗皇帝屢降諭旨褒卹有加痛哭發憤誓出殺賊以雪兄仇

而報

國恩頻年以來會克太湖潛山安慶蕪湖獨克繁昌南陵疊蒙

天恩獎敘聞望漸隆而臣弟貞幹孤懷鬱抑耿耿若不自得常思別樹一幟建立奇功以分

聖主宵旰之憂一洗軍營因循之習上年秋閒邁病羣勸出營調養適以援賊大至力疾督戰精神遽振日夜不倦臣方幸其病後耐勞志定勝氣人定勝天或者別立尺寸之功一償平生之願不料其中道損折齋志長終精炯炯而不冥神依依而戀闕微臣位高德薄殃及手足慟惜之餘彌增悚歎而

聖主優詔褒卹若深鑒臣弟未白之衷而曲體微臣難言之隱

此尤臣所闔門感戢存沒霑戴者也茲已素旄西旋歸從先隴

結草之報縱難索諸幽冥敵愾之情端有資於同氣臣當督率

臣弟國荃益勵丹誠誓除氛祲戰兢以任艱鉅忠信以涉波濤
庶慰季弟未竟之志而答

聖主非常之恩所有感激下忱謹率同江蘇布政使臣曾國荃

恭摺叩謝

天恩伏乞

皇太后

皇上聖鑒謹

奏

近日軍情片

同治二年正月十二日

再近日軍情金陵大營及金柱關蕪湖各防堅守如常均臻穩固青陽賊眾聞朱品隆一軍於二十二日趕到池州卽於二十三日陸續遁歸石埭十二月二十五日官軍收復青陽縣城駐兵守之正月初一日賊糾大股六七萬眾窺犯涇縣繞城築壘分踞黃村大坑一帶初四日涇城守將易開俊吳廷華等擊退撲城之賊鮑超於初五日自甯國疾馳九十里引軍來援遂於初六日會攻附城賊壘二十餘座悉破之乘勝進兵黃村又毀十數壘斬馘盈萬立解涇縣之圍初七日馳歸高祖山老營而羣賊已麇集寒亭清弋江等處勢將圍撲營盤計日內必有數

次大戰北岸之賊分踞和含巢縣東關銅城閘等城隘據守益
堅據搜獲僞文稱僞忠王現赴蘇州因常熟賊曰周興隆駱國
忠等投誠忠逆調集羣賊圍攻常熟不久卽率二十萬眾再犯
江北下擾揚州上窺皖楚等語雖未必果有其事而疊次僞文
該逆銳意竄擾大江以北殊可深慮除涇縣戰狀再行詳奏外
合先附陳大概伏乞

皇太后

皇上聖鑒謹

奏

委署皖南道缺片

同治二年正月十二日

再皖南地方賊蹤紛擾徧地瘡痍所有巡道一缺撫字籌防均關緊要前署皖南道姚體備在任年餘頗著勤勞輿情愛戴上年八月閒積勞病故維時實缺道員程鈺尙在潁州畱辦善後事宜未能飭赴本任查有安徽候補道葉兆蘭勤幹廉明最耐勞苦由潛山縣知縣帶勇出力洊保今職以之委署皖南道缺洵堪勝任臣與李續宜商定卽經劄委任事逮署撫臣唐訓方莅皖正需熟悉北路情形之人帶赴臨淮輾轉籌商遲久始克定議該員葉兆蘭卽於十月前赴皖南署任視事理合會同署安徽撫臣唐訓方附片陳明至皖南道與皖南鎮總兵關防二

顯臣於咸豐十一年五月奏請

勅部鑄印頒發欽奉

諭旨允准迄今未准賚到理合一併催請

勅部迅賜頒發以昭信守伏乞

聖鑒訓示謹

奏

鮑超軍大獲勝仗涇縣解圍摺

同治二年正月二十七日

奏爲鮑超一軍破賊於馬頭鎮楊柳鋪等處進援涇縣立解城圍恭摺詳報仰祈

聖鑒事竊浙江提督鮑超上年十一月二十七日在楊柳鋪擊賊獲勝及本年正月初六日涇縣之捷臣兩次附陳大概在案先是西河踞賊分擾小淮審地方與黃麻渡只一河之隔鮑超以該處守兵單薄水陸糧路可虞乃督馬步數營並何紹彩新訓二營於上年十一月二十四日馳赴黃麻渡會合王可陞防軍誘賊過河一擊敗之旋報花旗廣匪六萬餘眾由甯國縣進竄歇建廟直至高橋楊柳鋪吳村馬頭鎮一帶布滿賊館自甯

郡南至涇縣北至鮑超營盤被賊阻隔卽自高祖山老營以至
清弋江南陵亦幾爲賊氛所梗鮑超以老營空虛懼有挫失遂
自黃麻渡捲旗息鼓振旅還援遙見四面傳烽煙燄紛起訶知
僞跟王藍逆一股已對高祖山下寨僞佑王李逆一股已對清
弋江下寨另有賊騎數百由寒亭高祖山摩壘而過繞出抱龍
岡冀襲我營之後鮑超旣次清弋江先派宋國永守定高祖山
二十七日昧爽部勒各營徑從抱龍岡進令周有勝正中營王
有慶正左營萬守根正右營孫得友華左營攻中路唐仁廉仁
字營劉天勝副後營吳雲集春中營羅國才霆後營攻左路譚
勝達新右營李文益新後營洪容海啟化營鄧雲貴霆前營攻

右路賊恃眾悍列陣來拒旌旗一展鼓音若雷我軍以排槍輪擊多有應聲而殪者賊乃愈聚愈眾密布長圍傷我營哨數人羅國才衝賊過猛並陷於陣鮑超旋令梁美材王清泉萬鳳書劉順隆何紹彩唐友勝黃海清等營自山岡後分兩枝鈔入截賊數段賊隊大亂奪路竄奔諸將士合力薄之遂將歇建廟至楊柳鋪十數村落中賊卡賊壘一律平毀追襲近六十里殲賊近八千人擒獲無算此十一月二十七日進攻馬頭鎮楊柳鋪等處大勝之情形也自有此捷凡附近我營之高嶺梅嶺麒麟山各賊股伏匿不出者經月十二月二十五日鮑超抽隊出剿行次中途以積潦未乾泥淖盈尺不利軍行而止正月初一日

偽匡王奉王襄王諸酋糾合花旗股匪竄入大坑黃村進逼涇
縣城南包過城東擁眾六七萬人連營二十餘座各村煙火相
接彌望皆賊初四日該逆架梯蒙絮悉銳撲城城中守將易開
俊吳廷華等率勇登陴以木石下擊賊始斂退維時鮑超在高
祖山聞警恐涇城不支將貽甯郡後路之患計莫如速往擊之
乃簡行隊疾馳九十里初五日抵涇入城少息初六日五更時
裹飯傳餐拔關齊出先遣王衍慶鄧雲貴張遇春唐仁廉李文
益唐得勝六營蹴過山麓分匿叢箐深樹閒而以易開俊吳廷
華所部遙爲之應復令婁雲慶羅文宓周德馨何文喜四營依
山而上譚勝達蕭凌雲洪容海陳開用四營循河而上鮑超督

飭梁美材王清泉萬鳳書三營暨黃海清孫得友騎隊直前挑戰羣賊爭相出巢從山梁撲下婁雲慶羅文宓等正當其衝梁美材王清泉黃海清等步馬競進戰逾兩時將弁多有損折羅天順躍入重圍被賊矛抉出右目顛暈馬下王清泉急率步卒挾之而走亦爲飛子所傷約軍佯退引賊將近山麓號鼓一聲伏兵頓發婁雲慶等回鞭轉鬪面面夾擊賊乃大敗正欲歸壘瞥見壘中火起已爲譚勝達等所破我軍乘勝併進盡埽羣壘立解涇縣之圍長驅三十餘里遂入黃村賊不虞官軍之驟至有棄壘欲遁者有閉壘死守者眾軍士擁至濠下搶拔地鍼肉薄而登又平十數壘追二十里至大坑斃賊盈萬初七日鮑超

白涇縣回軍適西河之賊撲近寒亭高祖山老營將圖乘虛一
逞南望旗幟蔽空軍容甚盛乃相顧錯愕曰鮑超來矣亦卽一
閔散走此正月初六日馳援涇縣力解重圍之情形也臣查甯
國境內徧地逆氛鮑超以病餘之將新補之卒四出雕勦得此
兩戰軍威可以復振危局可以漸安所有出力人員可否酌給
獎敘以作士氣出自

聖恩至參將羅國才等六十七員弁均係前後力戰陣亡相應
另繕清單請

旨勅部各照原銜從優議卹所有官軍在馬頭楊柳鋪大獲勝
仗並解涇縣城圍緣由謹繕摺由驛六百里馳奏伏乞

皇太后

皇上聖鑒訓示謹

奏

涇縣守城陣亡員弁請卹片

同治二年正月二十七日

再駐守涇縣之總兵易開俊等於上年冬月杪擊賊先勝後挫及正月初閒守城情形臣已兩次略陳梗概旋據先後稟稱甯國縣另股於上年十一月二十一、二等日由柿木鋪竄近涇縣東北進踞潘村晏公堂一帶距城僅十五里二十五日易開俊商同吳廷華各帶小隊至三界鋪登高瞭望但見旗幟隱約人數不下二萬餘眾卽於是夜遣死士潛往附近山岡齊舉號火徹夜擾賊天甫向曙吳廷華率所部兩營會合葉明瑞陳青雲兩旗進攻潘村以蕭章開馬隊應之易開俊親率三旗直趨晏公堂王華國賀國楨率兩旗分路包鈔鏖戰逾時奮斬前鋒數

百人賊陣漸亂且戰且走而潘村之賊亦經葉明瑞等擊退吳廷華追過壩頭葉明瑞陳青雲由晏公堂大路斜刺而來會軍夾擊賊負重創餘匪遁入黃村官莊一帶易開俊以賊遁未遠不速除之終貽後患二十七日仍與吳廷華督率各軍分道馳勦略一交鋒賊卽駭走遂復黃村官莊驅賊於十數里外不料山坳伏發遽斷歸路敗賊回戈助戰我軍困入垓心易開俊搏鬪方酣猝傷馬股馬蹶墮地賊以亂刃擬之蕭章開大呼馳救易開俊更騎突圍而出將隊伍連環收歸軍士已多傷折矣二十八日賊黨乘勢撲城見城上守禦謹嚴相率退去正月初三四等日賊以大股環城奮攻晝夜不息競於矢石中駕梯而升

易開俊吳廷華令守塚士卒立斬數人擊毀攻具蕭章開曹義
勝復潛出鈔賊賊始歸巢初六日鮑超引軍來援城中士氣益
奮易開俊與吳廷華蓐食整隊俟鮑超各營轉過山麓引賊入
伏突出盪擊俘斬甚眾既平附城諸壘旋入黃村痛加剋洗俘
執羣醜兼獲賊糧而還臣查涇軍七營久與悍賊相持十一月
二十七日之挫軍心震恐卒能保全危城遮護甯郡洵屬有裨
全局所有節次陣亡之參將倪昌明等五十一員弁均堪憫惻
相應繕具清單附於鮑超請卹單內懇

恩勅部一併從優議卹以慰忠魂合附陳請伏乞

聖鑒訓示謹

奏

臣等謹將各處地方水災情形合摺具奏

伏乞 聖鑒訓示謹奏

竊臣等查本年各省水災情形較前年為重

除前經奏准撥款賑濟外

臣等查各省水災情形較前年為重

除前經奏准撥款賑濟外

臣等查各省水災情形較前年為重

除前經奏准撥款賑濟外

臣等查各省水災情形較前年為重

近日軍情並陳親赴金陵察看片日

同治二年正月二十七

再近日軍情金陵甯國各營穩守如常太平石埭等股踣伏未
動宣城縣屬之金寶圩於上年臘月二十日被偽侍王率眾攻
破該圩練丁逃至蕪湖者數千臣爲編營安插聞侍逆在圩中
大掠米糧仍圖窺伺蕪湖金柱關一帶該兩處防務暫難鬆勁
北岸無爲州原駐樹字五營本係李鴻章新募之卒現因救援
常熟進攻崑太兵力不敷飛調樹字等營回滬另撥韋志俊一
軍駐防無爲州城蕭慶衍專顧銅城閘一路尙足堵禦毛有銘
專顧巢縣一路實形單薄又在六安州酌抽元中瑞左兩營助
之惟九洑洲江面續有賊船百餘號晝夜趕渡據搜獲偽文賊

欲先攻浦口江浦以通進兵之路臣恐前敵各防未能穩固亟須親往察看通籌攻守事宜此次拜摺後卽日由水路駛赴金陵及無爲州蕪湖金柱關等處巡視一次往返約需月餘安慶存城兵勇尙有四千餘人責成司道各員權爲統率暫可無虞萬一巢縣踞匪蓄意西竄臣亦卽兼程旋省以資調度而顧根本所有軍務大概情形併微臣親赴前敵察看緣由理合附片陳明伏乞

皇太后

皇上聖鑒謹

奏

代奏李世忠請贖勝保罪摺

同治二年正月二十七日

奏爲據情代

奏仰祈

聖鑒事竊

臣接據江南提督李世忠函稱恭閱邸報得悉侍郎

勝保被劾各款欽奉

諭旨挈問交部治罪查勝帥性好夸大每於細行不知檢點中外久有物議今旣據實揭陳

聖諭至爲嚴切

朝廷議罰豈能曲示姑容爲臣下者均當以此爲鑒何敢於情真罪當之中妄參末議但勝帥受

先皇帝知遇奉

命討賊時閱十年身經百戰籌辦皖豫兩省軍務雖無成功而其中羈縻駕馭當局者煞費苦心咸豐十年秋

京畿震動幾至全局撼搖

特命勝帥總統援軍力保

畿輔而外國撫議始成

皇上御極之初勝帥因政柄下移無以服眾請

皇太后親理大政一摺孤忠凜凜大義昭彰此雖

國家大臣職分所當爲之事而勝帥之受

恩圖報不避嫌怨亦於此可見矣前此世忠舉眾投誠蒙勝帥

拊循備至老母年近七旬幼子年甫十六均賴保全曾憶其奉
旨回京臨別諳切告誡勉以竭力報

國無或隕越貽羞世忠今日之渥荷

殊恩全家之悉蒙惠澤至於斯極者未嘗非勝帥之提撕激勸
獎掖以成之也今中外眾口一轍交章彈劾

大廷論法自屬罪無可辭第念其數載治軍於無可寬宥之中
似尙有一綫可原之處且凡能任大權者往往廣招物忌此尤
朝廷用人不可不察者也世忠係在勝帥任內投誠例應避嫌
可否代爲陳奏儻蒙

聖主法外施仁准從寬議請先將世忠暫行褫職責世忠立功

代贖不效則併治世忠之罪世忠自當竭盡心力以期仰報

國家斷不致迄無成效剴切上陳不勝悚迫待命之至等情請

奏前來

臣

查勝保係統兵大臣革職逮治豈容闔外下臣一言

瀆請惟該提督李世忠係勝保招撫之人此次籲陳私悃自願

立功代贖

臣

亦何敢壅於上

聞理合據情附驛代

奏伏乞

皇上聖鑒訓示謹

奏

查閱沿江各軍並近日軍情摺

同治二年二月十二日

奏爲

微臣

查閱沿江各軍現抵金陵大營恭報近日軍情仰祈

聖鑒事竊

臣

親赴前敵各軍查閱營伍曾於正月二十七日附

片陳明在案次日自省起程乘舟下駛二十九初一兩日行過

池州大通聞蕪湖金柱關軍情喫緊初三日趕至蕪湖初四日

周歷城壘旋赴裕溪口晤侍郎

臣

彭玉麟由東西梁山駛赴金

柱關詢悉僞侍王連日撲犯該處二十四日在薛鎮獲勝一次

初一日在梅塘觜始戰小挫旋獲大勝初三日復獲勝一次初

五日

臣

行抵烏江水營與提

臣

楊岳斌同至金陵之大勝關初

六入雨花台營盤初七八等日逐段查閱均尙穩固壘據探報

忠逆之黨僞愛王黃崇發僞顧王吳如孝等股續渡九洑洲二
十七以後屢撲李世忠部將陳自明營盤至初二夜失陷初三
早浦口繼陷該逆遂分撲江浦橋林城壘勢甚猖獗聞將先竄
西梁裕溪再犯無爲廬州等語又據甯郡各軍稟報初一日廟
埠等處之賊分小股逼近郡城劉松山出城迎勦擒斬多名而
大股由敬亭山趨併楊柳鋪圍撲鮑超高祖山老營鮑超督率
諸將分路出擊大獲全勝旋即收復西河其小淮窩馬家園等
處賊壘亦經王可陞於初二日率師掃蕩由是鮑超乘勝進攻
又將紅楊樹高嶺梅嶺竹塘仰賢圩麒麟山各壘全行平毀其
灣沚一股經水師於初五日擊退綜計甯郡西南北三面百餘

里之賊一律掃除惟水陽鎮金寶圩尙未克復自去秋以來奇險疊生仰託

聖主鴻福竟得轉危爲安實屬至幸臣以南岸局勢較鬆調駐防三山之劉連捷三營北渡無爲州與毛有銘協守石澗埠調駐防塞亭之梁美材三營北渡廬州與石清吉協守郡城曾國荃亦撥熊登武等營添紮東西梁山以保要隘惟巢含以上地勢寬曠賊數眾多目前兵力單薄未敢浪戰必俟李續宜銷假回任江忠義由湘東來乃能會剿皖北由巢含迤邐而下直至浦口九洑洲除北岸之逆氛復去夏之初議至石埭太平之賊於初一日竄至黟縣旋即退出嶺外於潛昌化之賊初三日竄

近徽郡唐義訓迎擊獲勝此兩股意圖內犯江西不知能堵截
回竄否臣將金陵戰守事宜商定卽赴九洑洲相度地勢迴舟
西上仍往蕪湖裕溪無爲州一帶詳加察看如果巢賊上竄自
當兼程回省以固根本要地聞李世忠親赴五河所有浦口九
洑洲失陷情形尙未接其咨報卽甯國徽州金柱關三處大捷
亦未接其詳報除各路戰狀及應獎應卹人員續行具奏外謹
將微臣行程及南北兩岸近日軍情先陳梗概伏乞

皇太后

皇上聖鑒訓示謹

奏

由金陵回皖沿途查閱並近日軍情摺

同治二年二月二十七日

奏爲

微臣

由金陵回皖沿途查閱恭報近日軍情仰祈

聖鑒事竊

臣

行抵金陵曾將兩岸軍情於本月十二日具陳梗

概在案十五日由大勝關赴九洑洲該處江路狹隘與南岸草鞋夾列壘對峙是日風霾蔽塞瞭望不甚明晰卽於次日回舟西上十八日入金柱關小河查閱龍山橋三汊河查家灣等處十九至二十二等日由東西梁山入裕溪口小河查閱雍家鎮運漕石澗埠無爲州等處二十三日由神塘河出江現在舟抵大通不日卽可旋省北岸之賊十六日續陷江浦縣城新河口營壘迤邐西竄徘徊於巢含全椒之間未遽深入其僞忠王蹤

迹據李鴻章函稱該酋因浙東肅清調集羣賊併守杭省而自
畱蘇州未出據蕭慶衍稟稱該逆實已北渡於十三日入巢縣
城據各路生擒賊供僞天王令忠酋力攻西梁無爲州圖取廬
州和州之米令侍酋力攻蕪湖金柱關圖取甯國太平之米欲
還昔歲之舊觀以保金陵之巢穴各等語逆謀詭祕其確情不
得知也臣所調劉連捷三營已到石澗埠與毛有銘共紮十一

營地勢寬曠尙嫌兵單此外如西梁運漕無爲廬州等處亦僅
力能自固非俟李續宜江忠義到皖難以輕進南岸自甯國屢
捷後惟金柱關侍逆一股爭戰不休初一十六等日兩次猛撲
查家灣該逆雖大受懲創我軍亦疊有傷亡正擬令鮑超攻取

金寶圩進勦東壩以固皖南之藩籬而鈔侍逆之後路乃徽州
青陽兩處連日警報頻至石埭之賊黃文金古隆賢等併犯青
陽太平之賊分竄徽州各嶺又有花旗譚星兩股由浙江敗回
麇集徽境唐義訓初三日擊退歙南一路其東北兩路愈來愈
眾繞過郡城之西十五日唐義訓帶隊出勦從富竭橫至岩寺
街頗有擒斬而別股從黃山南來十五日猛撲休甯縣城唐義
訓以休城僅留三營不敷守禦添派王華雲一營十六日入城
協守至祁黟一帶王文瑞於初十日擊退竄擾石坑南湖之賊
其大洪禾戍等嶺時有逆蹤窺伺防不勝防臣本擬令朱品隆
回援徽州因青陽喫緊該軍不能抽動不得已令鮑超暫緩東

壩之行而先從南陵馳救青陽以解目前之急左宗棠肅清浙
東卽慮敗逆回竄皖南亦派劉典一軍援應徽州羣逆皆窮餓
之餘無巢可歸蓄意闌入善地就食江西若徽休青陽等城倖
得保全該逆或由祁西以竄饒景或由歙南以竄婺源均爲江
西北邊之患臣時時兢惕並函告沈葆楨預爲防範合力維持
所有微臣回皖行程及近日各路軍情謹繕摺具陳大概其詳
細戰狀仍俟分案續奏伏乞

皇太后

皇上聖鑒訓示謹

奏

沿途察看軍情賊勢片

同治二年二月二十七日

再密陳者

臣

巡閱諸軍詳觀賊勢攬南北之形勝察天人之徵

應竊以爲有可懼者數端而可喜者亦有數端自池州以下兩

岸難民皆避居江心洲渚之上編葦葺茅棚高三尺壯者被擄

老幼相攜草根掘盡則食其所親之肉風雨悲啼死亡枕藉臣

舟過西梁山等處難民數萬環跪求食

臣

亦無以應之二月十

五日大勝關江濱失火茅棚數千頃刻灰燼哭聲震野苦求賑

卹他處蘆棚叢雜亦往往一炬萬命徽池甯國等屬黃茅白骨

或竟日不逢一人又聞蘇浙之田多未耕種羣賊無所得食故

壹意圖竄江西并窺伺皖浙已復之區平糶無所得食弱者轉

徒溝壑黠者則從賊以偷生旦夕黨羽無定數酋長無定謀便
恐變爲流賊更難收拾而諸僞王中如李世賢失金華楊輔清
失甯國黃文金失蕪湖古隆賢失青陽劉官方失池州巢穴雖
破醜類尙多其意怏怏不甚服僞天王忠王之調度其行徑亦
與流賊相近李世忠之心迹中外皆不敢深信頃因捆鹽構衅
親赴五河雖浦口江浦失守尙未聞其回營主持與都興阿楊
岳斌蕭慶衍均有違言親匪類而遠正人逞小忿而忘大局茲
值敗軍失地之際又奉革職畱任之

旨竊恐其轉羞成怒倒行逆施則裏下河先受其災而此次北
渡之賊亦有直犯裏下河之謀鹽場尙有疏失全局愈難支持

凡此皆可懼之端也粵匪初興粗有條理頗能禁止奸淫以安
裹脅之眾聽民耕種以安佔據之縣民間耕獲與賊各分其半
故取江南數郡之糧運出金柱關取江北數郡之糧運出裕溪
口并輸金陵和春等雖合圍城外而賊匪仍擅長江之利挹不
竭之源傍江人民亦且安之若素今則民間賊至痛憾椎心男
婦逃避煙火斷絕耕耨者無顆粒之收相率廢業賊行無民之境
猶魚行無水之地賊居不耕之鄉猶鳥居無木之山實處必窮
之道豈有能久之理而東南要隘如安慶蕪湖廬州甯國東西
梁山金柱關裕溪口暨浙之金華紹興此皆山川筋脈必爭之
地但求此數處不再失守終足以制該逆之死命昔年粵賊所

至築壘如城掘濠如川堅深無匹近亦曰就草率而官軍修壘
濬濠今實遠勝於昔城中羣酋受封至九十餘王之多各爭雄
長苦樂不均敗不相救而官軍仰承

聖謨三江兩湖水陸各營頗能和衷共濟呼應靈通至百姓仰
戴

皇仁淪肌浹髓雖臣等撫綏無術治軍無效斯民久陷水火之
中曾不一聞怨咨之語翹首而望平寇擊壤而謳吾

君意者民心所在天祐孔長凡此皆可喜之端也臣從軍數年
從未敢以賊勢稍衰入奏惟念西北軍興

皇太后

皇上焦勞彌甚故將南中可喜之機陳述一二仰慰

宸廑至可懼之端

臣

殫竭愚慮勉思補救裏下河若有疏失當

在此兩月之中難亟謀挽回之術若竊號巨股變爲流賊昔

文宗皇帝嘗慮及之但求金陵蘇杭三處有一二克復卽當大赦羣酋廣爲招撫以庶幾赤眉百萬同日納降之盛軌此中自有天意不盡關乎人謀至李世忠雖梟桀猜忌而其部卒頗懷攜貳又不善戰縱或激之生變亦尙不足深慮

臣

始奉將李世

忠革職畱任之

諭本擬暫不宣示繼思該提督驕恣已久尾大不掉急亦有變

緩亦有變終不能相安無事卽日當宣示

諭旨待李續宜江忠義軍到由巢含一路東下進攻江浦等處
屆時或將李世忠失守各城嚴參懲究再行相機辦理合一
併密陳伏乞

皇太后

皇上聖鑒訓示謹

奏

祁門知縣唐治建祠片

同治二年二月二十七日

再前任祁門縣知縣唐治於咸豐四年正月閒賊竄縣境時與大洪司巡檢鍾普塘同時死節當經奉

旨賜卹在案嗣據該縣紳士饒際可陳得荃等以唐治莅任數載凡養士正俗聽訟諸大政遺愛在民逮賊陷祁城猶復勒騎巷戰被執痛詈卒至刳腹屠腸受禍最慘謹摭政績死事狀略籲請奏建專祠等情前來臣國藩前駐祁門聞該故員唐治生前卓有政聲殉節先一日以書遺其家屬誓守孤城早辦一死是其神識堅定晚近所難至今比戶謳思臣覽其遺書尤增感嘆允宜列之祀典應懇

天恩准將已故知縣唐治在祁門縣地方建立專祠其鍾普塘
一員並予祔祀以妥毅魄而順輿情是否有當伏乞
聖鑒訓示謹附片具奏請

旨

鮑超軍克甯國近城要隘摺

同治二年三月十二日

奏爲提督鮑超攻破賊巢悉復西河小淮窰紅楊樹麒麟山諸要隘恭摺馳報仰祈

聖鑒事竊照鮑超一軍會合何紹彩王可陞所部分勦高嶺西河直至麒麟山將賊壘全行平毀臣於二月十二日具陳梗概在案先是僞輔王楊輔清糾約僞隨王跟王堵王孝王佑王等酋嘯聚西河灣沚紅楊樹黃麻渡麒麟山一帶不下十餘萬人以一大枝鈔出高祖山之前潛匿邨落中距我營七八里十數里不等以一小枝繞過高祖山之背橫出楊柳鋪揚言上犯涇縣火光燭天晝夜不滅鮑超見山前賊旗隱約山後煙燄突起

計在誘我赴涇圖襲老營乃令宋國丞布置高祖山營寨堅壁
穩守而在板橋寒亭清弋江等營抽隊數成親自督率設伏於
太子廟山坳以伺其變二月初一日昧爽楊柳鋪火光漸息訶
知甯郡守將劉松山督同劉光明賀國楨李芳菲等出城雕鞬
殲擒數百人李芳菲率前哨躡賊中礮死之楊柳鋪一股旋向
烏沙鋪遁去鮑超料該逆不得逞於郡城必將挾全力以撲我
營自登太子廟山岡瞭望果見烏沙鋪之賊進逼獅子山去營
不遠各邨落之賊分三四萬眾旌旗蔽空迤邐而來將高祖山
八營層層圍裹有擁至濠下爭拔花籬者鮑超急帶太子廟伏
軍向山僻小徑捲旗疾趨行至離營二里許聞營中礮聲轟發

知老營業已出隊接戰卽派譚勝達顏紹榮甘星平徐連陞等直取中路萬守根洪容海羅文宓張遇春等由營後左路進以婁雲慶黃海清唐得勝數隊爲之應王衍慶何紹彩曹志忠等由營後右路進以唐仁廉鄧榮貴孫得友數隊爲之應仍令梁美材王清泉萬鳳書等潛伏茯苓山之旁以斷賊後部勒旣定但聞鼓角一聲譚勝達萬守根王衍慶各軍突分三路包賊霎時合圍宋國永乘勢從各營夾縫中擊出截賊數段鄧訓誥周有勝等張兩翼鈔殺賊隊譁亂不復成伍正思奪路竄走適婁雲慶黃海清唐仁廉等馬步齊至我軍縱橫盪決賊之前鋒鮮有脫者而賊之後隊尙欲抵死來援鮑超揮令諸將士奮力衝

擊追近挾荅山梁美材大呼突出早斷歸路羣賊駭懼罔知所措紛紛竄入田壠眾軍合力蹙之追襲四十餘里遂平高嶺周家橋諸壘直抵西河賊乃倚水爲險對河列陣意圖抗拒俄而盧榮忠帶霆營礮划由清弋江駛下我軍結筏爭渡水陸夾勦俘戮無算立毀堅巢敗賊始往桃花園灣泚一路而遁此二月初一日擊賊大勝攻克西河之情形也西河以北曰馬家園爲眾賊屯糧之所迤西則曰黃麻渡曰小淮窰爲王可陞進兵之地西河旣復王可陞知羣賊膽寒卽於初一夜派蔣占鼇楊忠楊明貴等會約駐守峩橋之楊正彪各率行隊進取小淮窰親督陽華坤謝占春馬承恩數營取道黃麻渡潛襲馬家園逆壘

時已夜分更鼓將絕王可陞令軍士傍壘縱火悉焚賊糧賊不知官軍之猝至在睡夢中披衣急起棄壘狂奔小淮窰之賊正欲聞警赴援蔣占鼈等已斫斷浮橋破卡而入乘勝逐之蹙偏入水者無數沿途卡壘盡毀靡遺維時賊之由西河遁入灣沚者經盧榮忠礮划隨同外江水師日夜轟擊賊不能堪乃於初二初三等日縮入灣沚之後山退聚竹塘旋分大股歸併梅嶺麒麟山意在伺閒再逞鮑超謂賊燄雖衰不速除之終貽後患初四日引軍渡河進次紅楊樹偪壘而陣壘賊匿不出戰我軍相持數時羣以火器環擲延燃哨棚軍士冒煙突火踰濠直進一壘旣陷眾壘盡亂各將弁揮隊盪擊殲獲頗眾直追過桃花

園竹塘灣止後山賊皆聞風先遁遂焚其巢是夜鮑超遺書劉松山令於初五日自郡城率師來會將有事於梅嶺及麒麟山天甫向曙秣馬蓐食傳令宋國永熊鐵生梁美材等十五營專攻麒麟山婁雲慶唐仁廉黃海清等馬步八營專攻梅嶺而以劉松山所帶各旗營爲斷後行未十數里賊竟糾眾來迎宋國永同各營哨就山麓布列陣勢直前搏戰潛遣銳卒自山後舉旗先登襲破賊壘周麾而呼賊咸驚疑卻顧宋國永等縱兵掩擊積尸若阜麒麟山堅壘悉平是日劉松山亦破廟埠之壘殲賊千餘婁雲慶鄧榮貴等擊破梅嶺之壘並收復仰賢圩各處餘匪分道竄逸一由新河莊敗往東壩一由油榨溝敗往廣德

建平此初二至初五等日疊克馬家園小淮窩及紅楊樹梅嶺
麒麟山等隘之情形也臣查西河小淮窩爲水路衝要自被賊
踞數月糧運梗阻大爲甯國各營之患仰賴

聖主威福將士同心五日之間悉復諸隘距郡城數十里內一
律肅清在事人員厥功甚偉可否彙入楊柳鋪涇縣各案酌給
獎敘之處出自

鴻施逾格至力戰陣亡之參將李芳菲等二十六員弁另繕清
單請

旨勅部從優議卹以慰忠魂所有鮑超各軍連克甯國近城要
隘緣由謹繕摺由驛五百里具奏伏乞

近日軍情片

同治二年三月十二日

再近日軍情金陵駐守如常甯國自二月初屢捷後鮑超派何紹彩一軍守西河王可陞一軍守灣沚洪容海一軍守清弋江其劉松山仍守甯國府城易開俊仍守涇縣朱品隆仍守青陽縣又換調吳廷華守南陵縣逐節布置糧運通暢甯郡應無他虞蕪湖金柱關兩防自前月十六日大戰獲勝該逆至今不敢再逞臣於二十七日過大通聞黃文金等大股由青陽上竄臣卽兼程西旋次日抵省調喻吉三護軍二營赴池州李榕鈞字五營赴東流以截賊竄江西之路乃兵甫渡江賊已由建德闌入彭澤鄱陽境內而譚星及古賴等股又蔓延於徽州各屬兩

路皆有深入江西之計幸浙江臬司劉典與唐義訓王沐等在
休歙兩縣屢獲勝仗徽州一路必可擊退其由建德一路竄入
者實恐貽江西腹地之憂臣正檄令鮑超由青陽赴援景德鎮
冀保江西完善之區旋據北岸各營告警偽忠王大股上竄分
枝牽制廬江無爲州之兵而以全力猛撲石澗埠毛有銘劉連
捷營盤自初三至初七日晝夜圍攻糧路斷絕文報不通臣不
得已又飛檄鮑超改旆渡江以解石澗埠之圍曾國荃亦自金
陵分撥五營救援該處不知均趕得及否又有捻匪一股從河
南竄入湖北之麻城經鄂軍堵剿卽自三里埂竄至蘄水境內
其勢亦將歸併皖境髮捻聯成一片安慶廬州各屬處處喫緊

竄入江西之賊別無大支勁旅可以派往援剿幸撫臣沈葆楨
久調水陸萬餘人分守景鎮樂平兩處或者足資扼堵江之南
岸徽州與江西同警江之北岸下游與上游同警臣調度無方
憂灼實深除石澗埠等處戰守情形續行具奏外理合附片先
陳梗概伏乞

皇太后

皇上聖鑒謹

奏

李世忠軍營失陷摺

同治二年三月十二日

奏爲賊渡九洑洲攻破李世忠各營進陷浦口江浦兩城橋林一隘恭摺馳報仰祈

聖鑒事竊提督李世忠一軍所駐九洑洲浦口江浦各城隘壘被賊眾攻陷分撲橋林營壘臣於二月十二二十七等日兩次具陳大概在案旋准該提督先後咨稱九洑洲浦口各營自被賊圍前敵糧路梗塞軍火又無接濟與江浦不能互通消息危急萬分二月初三四兩日又增賊黨二萬餘人用牛皮爲幃雜以洋礮隊并令洋人燃放開花炸礮四面環攻我營受傷雖多

深知沿江要地不忍輕棄於賊尙各誓以死守無如賊勢過眾

猛撲不休該將弁等曰不交睫手不釋刃竭力堵禦兩晝夜至初四晚勢難再支遂將浦口以西及城南營寨一併撤回江浦城內查浦口一城本毀於賊我軍在西南兩門外分營駐紮此次被圍挫退實因半月來內無糧藥外無援軍以致不能固守至江浦存城將士自初五日而後亦經力守旬餘屢與賊戰傷折不少乃賊眾繞城密圍水泄不通城中食盡糧運又絕日僅一粥尙不能飽餐子藥既罄徒以甌石擊賊而賊攻益急行將就斃該鎮將因於十六夜率領弁勇冒死殺出江浦縣城維時橋林防營已被困二十餘日江浦陷後羣賊悉趨橋林該營守將邱昌良激厲士卒奮勇爭先以守爲戰十八日賊竟愈聚愈

多不下六七萬眾洋礮洋槍子如雨下我軍抵死堅守疊有傷亡賊又以西瓜巨礮轟塌礮台緣梯直上并有踰濠越牆而進者各勇短刃相接眾寡不敵邱昌良身受重創經左右背負出圍退至大勝關查點部卒二千人亦已十傷八九所有各該處失事人員委係力盡援絕可百均邀寬免惟世忠忝襄軍務不能先事籌防無可辭咎應乞奏參請

旨革職撤去勇號不准畱營另行派員接統豫勝營一軍或在
本營各將中擇能任使查有遇缺題奏提督記名總兵甘肅安
西協副將朱元興堪以勝任卽請奏派該員接統以重軍事而
免貽誤世忠罷職後決不任意妄爲致負

國恩等情請奏前來

臣

前在金陵行次據探報賊渡九洑洲屢

撲李世忠部將陳自明營盤至二月初二夜失陷初三早浦口
繼陷卽經據實陳奏茲據來咨稱浦口各營於初四夜撤退日
期稍有不符自係探報未確伏查浦口江浦二城爲濱江絕大
關鍵一經失此重險上可由和含巢各屬進逼廬州下可犯儀
揚各防進窺裏下河表延數百里游衍自如未易勦辦該提督
李世忠悚惶引咎深明大義應如該提督所陳請

旨將李世忠卽行革職撤去勇號不准畱營并懇

聖恩允其所舉卽派遇缺題奏提督甘肅安西協副將朱元興
接統該軍以重防務

臣

自上年十月卽有調度該軍之責未能

先事籌畫又不能設法救援咎亦難辭請

旨將臣交部嚴加議處除陣亡各將弁俟咨到續行

奏卹外所有賊陷九洑洲浦口江浦橋林各城營緣由謹繕摺
由驛馳奏伏乞

皇上聖鑒訓示謹

奏

皇上聖鑒事

臣等謹將

臣等代刊自題台小州限前口工與辦材台與修修由海

官林直交部辦理等因刻刻台各詳台新台國

水雨等因又不詳查志刻刻若亦無事

蕪湖金柱關水陸防軍屢勝摺

同治二年三月二十七日

奏爲水陸各軍在蕪湖金柱關一帶累月苦戰獲勝續報詳細情形仰祈

聖鑒事竊蕪湖金柱關水陸各營自去秋以來戰爭不休金陵解圍以前業經縷晰具奏十一月以後節次戰勝並奪回灣沚一隘臣國藩已將大概軍情先後具奏並聲明續行詳奏在案上年十一月間僞侍王李世賢自金陵敗遁後糾悍賊數萬人礮船槍划數百號突出東壩將犯金柱關分竄蕪湖會國荃以該兩隘水涸兵單恐爲賊乘派武明良一營馳紮東梁山朱洪章兩營馳紮龍山橋以爲聲援初八日金柱關守將羅逢元朱

南桂截賊於花津三十五等日復敗賊於上駟渡萬頃湖及
梅塘觜之西岸疊有斬擒十七日朱南桂與臣岳斌商制敵之
策俄報賊之由陸路來者右至魚壩左至太平府由水路來者
已至三汊河環偪我營是日南風大作水師不能助戰朱南桂
羅逢元憑營燃礮一發而殪數酋賊爲少卻我軍出濠縱擊復
以火箭焚賊四船賊始紛紛奔北十九夜羅進賢李助發率水
師潛往襲之奪獲二十餘船擒僞清天安陳緒賓而還二十二
日賊由窩頭率黨護舟復犯三汊河營寨勢更洶湧並有用飛
划登岸者朱南桂羅逢元引軍齊出朱洪章武明良亦率隊來
助併力搏戰追及河千萬化林唐學發等水營乘勢奪船數十

號賊之墮水而斃者以千計二十六日水陸各營會議賊屢來西岸攻我未得一逞不若我軍東渡擊之是夜五更朱南桂朱洪章羅逢元整旅渡河分道疾進朱南桂令謝大洲率哨勇先赴上駟渡以截青山後路而自領所部進次卿家橋有一賊卡梗道矢石如雨並有礮划密布橋下我軍猝不得前忽聞水際礮聲自遠而近萬化林彭楚漢羅進賢等已拆賊浮橋自下游飛漿而來衝開賊划面面環擊一時逢飛檣折戶塞河流朱南桂見水路得手知卡賊亦將奪氣卽飭潘泗知宋楚懷等躍入卡內縱橫擊刺駢戮無遺羅逢元一枝沿河勦殺正攻涂家渡二堅壘未下適朱洪章從青山鈔來哨弁嚴洪賓等鼓勇先登

立破二壘武明良亦帶隊趕至環壘奮擊壘中之賊無一得脫其西岸一卡一壘亦經水軍登陸攻破是日斃賊最多奪獲戰船一百一十號洋礮二百餘尊此十一月初八至二十七等日金柱關水陸壘獲勝仗之情形也自有此捷賊之跽伏不出者幾兩月意謂金柱關防務可以少休不料賊之窺伺愈深蓄計愈狡金柱關之上十里爲三汊河又上十里爲龍山橋又上爲梅塘觜又上爲查家灣新圩角又上爲三里埂清水河則蕪湖水師分防之汛地也賊不得志於下游乃繞竄梅塘觜以上本年正月二十四日在新圩角掠船搶渡朱洪章輕騎馳往誘賊深入一擊敗之朱南桂等謀之水營謂賊方在上游西竄我宜

從下游東渡薛鎮老巢可以襲而取也二十七日羅逢元派兵
伏於花津之下而自從中路進朱寬義從右路進朱南桂從左
路進軍次薛鎮賊錯愕無備閉壘死守堅不出戰各哨隊繞壘
而攻水師以巨礮傍堤轟擊賊棄壘爭竄竄至花津者半爲伏
軍所殺我軍力薄不能分防河東老營仍紮於三汊河龍山橋
而分兵戍守查家灣新圩角以上更番換防二月初一日賊由
新圩角悉眾來撲朱洪章整軍以出搏鬪方酣不知另股由萬
頃湖渡過鈔我卡後朱洪章撤隊急退賊已層層包裹我軍敗
挫朱南桂帶隊馳援朱洪章亦奮力衝出重圍始解而弁勇已
多損折賊猶疾如風雨猛撲不休朱南桂派彭維祥向以田堵

河邊一路向世驥劉紹林等堵陶家灣一路仍自帶大旗親兵
並振字營兩哨衝入查家橋街中苦戰逾時羅逢元朱寬義分
數路截擊斷賊歸路自是轉敗爲勝賊乃奪路竄奔眾軍乘之
多有爭渡而溺者次日羅逢元朱南桂密約蕪湖防兵周萬倬
吳坤修等水師彭楚漢羅進賢等乘賊屢挫共籌再舉初三日
各軍水陸並進行至萬頃湖邊見浮橋一道上下環列賊壘十
五座賊卡賊棚延亙十餘里羅逢元朱南桂朱洪章督隊過橋
直薄賊壘周萬倬劉祥勝等繼之號鼓雷鳴火器颺發沿河礮
船繞擊相持兩時彭楚漢等毀橋登岸縱焚賊棚陸軍爭拔地
賊蟻附而上悉破卡壘誅夷過半遂搜勦至上駟渡以歸十五

日賊以小枝排列梅塘觜查家灣對岸而以大枝由新圩角過河專撲朱洪章營卡時李祥和來自金陵十六日率師助防新圩角甫至該處而長勝營守卡哨勇先經挫退賊如潮湧捲地而來李祥和與吉左振字營各哨悉力堵禦且戰且走退保老營羅逢元朱南桂聞警布置一面飛商彭楚漢等水師來援一面自簡精銳倍道進發羅逢元由陸公壩繞河而上朱南桂朱寬義由霍木山前進行未數里聞水營羅進賢與賊戰於梅塘觜已報捷矣又數里旌旗一色彌望皆賊朱南桂羅逢元等分四路衝入萬刃交下槍子橫飛賊乃大潰我軍直追至新圩角河邊水師彭楚漢等適自梅塘觜追賊而至一鼓蕩洗餘賊盡

溺於河此正月二十四日兩路同捷二月初一初三十五十六
等日兩次小挫兩次大勝之情形也先是周萬倬吳坤修兩軍
勦賊於南新圩三不管等處進踰四壘斬馘頗眾臣玉麟以該
處近逼蕪湖不能專恃陸師乃令任星元左光培等移師船於
清水河爲之倚護正月二十三日賊黨自三里埂循河而下距
蕪湖不遠任星元左光培率各船泝流迎擊王三錫登堤督戰
中賊槍子洞穿右脅仍復揮兵衝突將賊擊退二月初四日灣
沚踞賊將犯我清水河萬化林會商任星元左光培等乘夜駛
船潛往五更卽抵灣沚各船方燃礮轟發適霆營新破西河之
賊派舢板從清弋江而下駛合力猛攻更於晨霧中分水勇爲

早隊在街口積薪焚之賊不及防以爲官軍水陸併至急遽無措出巢紛竄我軍遂收復灣沚一隘旋值河水漲溢萬化林左光培任星元等進攻三里埂賊壘日夜不息朱洪章等亦率陸軍來會賊於三月初十日焚壘宵遁退併黃池萬化林等飛駕舳板直逼黃池石壘之下該逆自恃岸峻壘堅列礮以待任星元萬化林二營奮力仰轟左光培帶數哨登岸與水面戰船摩壘夾擊各賊驚潰我軍立復黃池剗平石壘朱南桂羅逢元等陸師會約彭楚漢等水營亦於次日盡破伏龍橋護駕墩花津賊巢擒斬甚夥羣賊遁往金寶圩溧水丹陽一帶此二月初五日水師攻克灣沚三月初十一等日續克黃池悉收內河要

地之情形也臣等查蕪湖金柱關兩城隘爲江介要衝又爲金陵各營後路上年八九月間賊蹤環伺諸將士五旬苦戰幸獲保全今又屢卻逆氛連克灣沚黃池以通甯國蕪湖之氣實屬始終不懈勞苦功多所有陣亡各員弁另開清單請卹在事出力人員可否彙入前次案內容臣等開單奏保以資鼓勵出自聖恩所有金柱關蕪湖水陸防軍屢獲大勝克復灣沚黃池各要隘緣由謹繕摺由驛五百里馳奏伏乞

皇太后

皇上聖鑒訓示謹

奏

保穆其琛補無爲州實缺片

同治二年三月二十七日

再現在代理無爲州知州穆其琛四川舉人考取教習選授巴

縣教諭經前任湖北撫

臣

胡林翼咨調隨營辦事咸豐十一年

八月

臣

札調來營襄理文案一年有餘精細勤慎

臣

察其才具

堪勝繁劇同治元年閏八月檄令代理無爲州該員自履任後
鉅細躬親實事求是釐剔州縣向來積弊據實上達地方應辦
之事次第舉行甫有端緒而賊由九洑洲渡江十月二十八日
竄踞含山巢縣距無爲州僅數十里次日書役人民紛紛遷避
闔城爲之一空該員獨坐署中堅忍靜鎮迨援兵漸至固結民
志保衛危城厥功甚偉本年強寇壓境大軍雲集一面支應軍

需一面辦理隄壩工程肆應裕如不形勞瘁現當地方糜爛之時分發院省人員率皆裹足不前非破格錄用不足以資鼓勵相應據實保奏籲懇

天恩卽以該員穆其琛補授無爲州知州以爲臨危鎮定者勸
是否有當伏乞

皇太后

皇上聖鑒訓示謹

奏

揀調各員畱皖委用摺

同治二年三月二十七日

奏爲揀調各員畱省補用並請多發卽用知縣來皖以資差委
恭摺仰祈

聖鑒事竊惟行政之要首在得人吏治之興廢全繫乎州縣之
賢否安徽用兵十載蹂躪不堪人人視爲畏途通省實缺人員
僅有知府二人州縣二人卽候補者亦屬寥寥每出一缺遴委
乏員小民久困水火之中偶得一良有司拊循而煦嫗之無不
感深挾纊事半功倍如署蕪湖縣知縣劉世墀臣於上年六
月奏明委署斯缺臣此次巡視各軍舟過蕪湖卽聞境內之民
頌聲四起比以母憂去任臥轍攀畱者相屬於道可見民心之

易感而吏治之尤宜亟講也然使拘泥舊章繩以格例不稍示
變通之法則目前幾無可委之員不廣開登進之途則將來難
收得人之效臣上年所奏委署之二十人旋准部咨分別准駁
合例者祇有五人其餘如劉世墀等均在不合例之列臣於奏
署後隨時察看其有人地未宜者業經陸續撤委其尙屬得力
者雖與例未符亦仍從權畱任湖查湖北省自三次克復後地
方彫敝與今日之安慶相同經前撫臣胡林翼羅致賢才多方
培養不數年間吏治漸振撫字催科綽有條理咸豐九年胡林
翼奏補府州縣各缺大半與例不符奉

旨交部核議均經通融議准在案

臣擬此後卽比照湖北章程

辦理聞有才品較優譽望漸著者隨時札調來營試用如其有
裨吏治專案奏請錄用苟非實有過人之才不敢率爲破格之
請縱或稍出定例之外亦不悖乎立法之原查有前任四川巴
縣教諭穆其琛臣檄令代理無爲州知州該員識力堅定心
地樸誠實屬不可多得之員又前任四川梁山縣知縣曾化南
指分江西試用知縣蔡家馨臣先後畱營辦事均屬才堪造
就合無仰懇

天恩准將穆其琛曾化南蔡家馨三員畱於安徽酌量補用再
上年臣奏請於新進士新拔貢兩班中各配籤十餘枝分發安
徽補用部臣以業經掣籤未及添配相應請

旨敕下吏部於本年新進士卽用知縣班中籤掣安徽省十六人並飭令迅速赴省聽候差遣委用該員等初履仕途未染習氣庶幾拔十得五循吏漸多分布各屬撫卹遺黎仰副

聖主澄敘官方惠愛民生之至意所有安徽調用人員理合會同署撫臣唐訓方恭摺具奏伏乞

皇太后

皇上聖鑒訓示謹

奏

近日軍情片

同治二年三月二十七日

再近日軍情金陵雨花台一軍撥彭毓橘七營北援無爲州後
兵力稍單守局尙穩金柱關蕪湖甯國等處距賊漸遠防務大
鬆徽州三面皆賊臣僅畱唐義訓一軍防守徽休兩城十分單
薄幸賴左宗棠派劉典王文瑞兩軍沈葆楨派王沐一軍分駐
休甯祁門竭力防勦劉典王沐各營在於長林梅嶺岩寺草市
等處疊次苦戰獲勝王文瑞亦於漁亭七里橋等處屢戰獲勝
十一日大破黃文金股匪於小路口徽休祁門各城或可倖保
然賊思假道徽境內犯江西其謀未嘗一日息也其嶺外石埭
太平等處又有古賴劉藍等股與嶺內黟祁北面之賊粘連一

片縱橫蹂躪臣飭朱品隆由青陽進攻石埭冀掣動徽賊之後
路三月二十二日大戰獲勝仍以賊多兵寡未敢輕離青陽之
本防深入石埭之重地鮑超渡江北援之師三月十六日始抵
無爲州正欲進勦石澗埠十七日黎明蕭慶衍彭毓橘會合水
師由黃雒河進兵並約被圍之毛有銘劉連捷等由內擊出大
破賊壘賊卡立解石澗埠之圍鮑超聞重圍已解登舟仍回上
游欲再踐赴援江西之約臣聞賊之大股並未退回巢縣悉銳
上竄直撲廬江乃飛檄鮑超急登北岸先援廬江忠酋於十九
日攻撲廬江縣城守將梁美材吳長慶等登陴堅守伺隙出擊
擒斬甚眾賊由界河迤邐而北分竄桐城舒城一帶其由鄂東

竄之捻股在蘄水分爲兩枝一枝回竄黃州一枝下竄皖境十
八日攻撲宿松縣十九二十等日越過太湖潛山界上二十二
日自青草塌突撲桐城守桐城者爲湖南提督周寬世開城迎
擊擒斬頗多賊遂入孔城鎮與廬江之大股髮逆聯成一片矣
據搜獲忠酋僞文將由舒城六安而上英霍麻城宋埠一出黃
州一出漢口擾犯湖北意欲掣我南岸之兵以援北掣我下游
之兵以援上無非圖解金陵之圍臣以該逆規畫甚大蓄謀甚
狡湖北爲數省樞紐不可稍有疏失飛咨官文嚴樹森調成大
吉回駐灑口撥水師速赴武漢聞李續宜於初十日自湘啟行
擬俟其道出鄂疆商請暫駐黃州會籌鄂皖大局當此南岸喫

緊之際臣方恨無力援徽援江乃北岸事變疊生下則江浦浦

口和含巢縣一片逆氛上則髮捻巨股疊撲名城兼圖鄂境而

苗練復於十八日圍攻壽州並在正陽關毀關擄船叛迹大露

微臣調度乖方艱危百出憂憤何極所幸浙滬兩軍捷書頻至

浙軍若克富陽一城杭州卽有可圖滬軍若克崑山一城蘇州

卽有可圖仰託

聖主威福但求皖鄂江西不大決裂與各悍賊相持數月俾蘇
浙果收成效或者大波特起旋慶安瀾焦灼無地之時輒不勝
禱祀微倖之想除各路戰狀分案詳奏外合先附陳大概伏乞

皇太后

奏
皇上聖鑒謹

石澗埠六安州廬江等處戰守情形摺

同治二年四月十日

奏爲忠逆大股疊撲城營官軍苦守力戰石澗埠廬江桐城舒城六安州先後解圍恭摺馳陳仰祈

聖鑒事竊自石澗埠圍營之賊經水陸各軍合力勦退後進撲廬江分竄桐城舒城與由鄂東下之捻股聯爲一片臣於三月

二十七日附陳大概在案僞忠王李秀成以三月初二日犯石澗埠揚隊焚屋近逼我營該處將領毛有銘劉連捷等密飭士卒穩守營寨以觀其變初三初四等日賊眾數萬圍攻南後營及瑞左溥左溥右元中信中營東草如山呼聲動地各負片板撲近溥右營濠邊毛有銘以中右營兩後哨前往助守排礮

環擊殪其前鋒賊猶晝夜猛攻相持不下如是者數日初七日
毛有銘挑銳卒潛出濠外突焚積草劉連捷復於初九日派隊
奮擊悉毀攻具賊爲少卻仍於營前營後增壘盈百層層合圍
營中文報不通糧運汲道一時俱絕如是者又數日曾國荃在
金陵聞警卽派彭毓橘率馬步八營倍道而至彭玉麟亦調周
萬倬劉祥勝等渡江來援遂與蕭慶衍會軍於黃淮河十六日
彭玉麟親督水師進次海子口牽制東關一路遣死士溷入石
澗埠營中密約詰朝會戰是夜四更彭毓橘率師進攻釘子壩
皇圖寺各賊壘蕭慶衍周萬倬率各師進攻黃龍岡迎珠塔各
賊壘號礮齊發毛有銘卽於重圍中衝出攻草鞋嶺之壘劉連

捷出攻石澗埠之卡王載駟等亦馳出戰賊於羊虎山瞥見黃龍岡迎珠塔火光突起知黃雒河援軍先已得手遂乘勢猛進併力夾擊俘斬無算彭毓橘亦自皇圖寺來會縱橫盪洗羣壘悉平而東關賊援亦爲水師堵退忠酋各黨乃分向小嶺開成橋而遁此三月十七日力解石澗埠重圍之情形也臣所調鮑超北渡之師十六日抵無爲州未及移營進勦聞賊已解圍以去擬回軍以踐上援江西之約甫及登舟猶未行也賊之另股竄盛家橋者先於十二十三等日逼犯廬江該城守將有吳長慶等三營又截畱梁美材等三營分段繕守乘賊喘息未定一擊卻之十五日王占魁出城雕勦又捷於羅家埠至十九日忠

酋大股自石澗埠而來悉萃廬江圍撲城池

臣

飛檄鮑超舍舟

登陸轉援廬江而廬江之賊已於十九二十等日經吳長慶梁
美材等堅守得完伺懈出擊賊遂解圍西竄梅心驛二十一日
突攻舒城之西南兩門守舒城者爲安肅道蔣凝學分軍迎勦
賊退七里河是夜設伏誘賊大挫兇鋒執僞天將羽天福於陣
維時捻逆張宗雨髮逆馬融和等由豫而鄂而皖聞道疾馳足
無停趾瞬息而至桐城守桐城者爲湖南提督周寬世出戰於
三里街凌厲無前賊大怖將謀宵遁我軍聯騎追勦該逆遂往
孔城鎮與忠酋合而爲一矣二十三日忠酋前隊衝至六安州
之十里埠該州城大而圯畱守者僅有蔣凝學部下王臨祥袁

秀林兩營及糧台道員曾廣翼知州何家驄而已四人者力籌
守禦二十四日賊以大股繼至自東南迤北而西植旗若林面
面結壘軍士守定堞口各以巨礮環轟會不少卻二十五日賊
分三路來攻將抵城根東門城垣久爲風雨所損猝傾六七丈
一時塵土蔽空羣賊大呼擁入王臨祥麾兵齊上抽刃攢刺擲
尸城下曾廣翼袁秀林飛騎繼至悉戮進口之賊搶築木城二
道二十六日賊攻小北門旋即擊退二十七日賊眾傾巢而出
自北城以至西城幾無寸隙憚我城上礮火猛烈欲前且卻其
尤悍者挽盾直前誓以死搏我軍屹立不動俟其躍過城濠火
球擲下焚賊無數始各裹尸而退二十八日曾廣翼王臨祥見

城南一二里外掩映賊旗徘徊不進乃令勇士縋城馳擊斃賊
六人三十日又縋死士出襲鮑家圩擄糧之賊斬僞富天豫張
承得擒僞左監議劉朝柱臣以六安州係淮南樞紐恐忠酋與
苗捻勾合愈不可制檄鮑超由廬江往援檄劉連捷彭毓橘毛
有銘由無爲州往援鮑超將至舒城賊遂於四月初二日解圍
遁往廬州一路此廬江桐城舒城防守得完及六安州解圍之
情形也臣查無爲州爲江北之膏腴六安州爲皖鄂之要衝忠
酋以全力圍撲石澗埠冀破無爲旋由廬江舒桐糾結捻股圖
爭六安一城其行蹤爲至疾其蓄謀爲至狡諸將士苦籌戰守
城營均獲保全使賊不敢橫竄鄂畱均屬著有微勞所有固守

石澗埠六安州尤爲出力之布政使銜記名按察使劉連捷請
交部從優議敘記名道毛有銘請

賞加按察使銜並

賞給勇號藍翎江西候補道曾廣翼請

賞加鹽運使銜並

賞換花翎候補副將王臨祥袁秀林均請

交軍機處記名遇有總兵缺出請

旨簡放署安徽六安州事補用同知直隸州何家驄請以知府
補用先換頂帶其餘出力員弁可否容臣查明酌請獎敘之處

出自

聖恩花翎參將黃仁親藍翎都司趙人和藍翎守備蕭淇松守
備劉紹志藍翎千總吳秀高藍翎把總李大材毛昌五謝仁週
藍翎外委李升山沈謙德向慎光外委童景星均在石澗埠接
戰陣亡應請

勅部各照本職從優議卹所有皖北各城營防守解圍緣由謹
繕摺由驛五百里馳奏伏乞

皇太后

皇上聖鑒訓示謹

奏

覆陳淮鹽暫難改辦官運摺 同治二年四月十二日

奏爲淮南引鹽察酌現在情形暫難改辦官運恭摺覆陳仰祈
聖鑒事竊臣承准議政王軍機大臣字寄同治元年十二月初
十日奉

上諭本日據中允錢寶廉片奏請官運淮鹽以裕軍餉等語淮
南鹺務廢弛已久現在運販楚北者劣員奸商居多曾國藩雖
設卡抽釐而所得未多前據戶部奏請飭該大臣酌提成本由
官督運則利權操之自上而於皖浙軍餉必能稍資接濟茲據
該中允所奏與戶部前奏是否可行著曾國藩一併悉心議奏
等因欽此旋於本年正月二十八日接准戶部來咨淮南鹽務

應先試辦官運一案經該部詳晰具奏請

飭臣遴選公正大員實心經理奉

旨依議欽此並鈔錄原奏咨照到臣當卽轉行兩淮運使喬松年議覆去後茲據該運使詳稱竊繹戶部之意係欲加徵課銀收回引地以冀漸復舊規又恐商販不前改由官運洵是籌辦南鹽至要之策無如引地爲鄰鹽侵占日久籌銷極難正課因釐捐抽納過多加增非易上年江路漸通楚西兩岸亦嘗招商試辦乃以淮鹽久不到岸所銷盡是川鹽粵鹽蓋川粵之成本較輕賣價可減淮鹽之成本最重賣價獨昂故淮鹽之疲滯斷不敵川粵各鹽之旺銷則商旣不前卽官運亦恐無起色至部

文所稱仍以四百斤爲一引令繳正課每引三兩七分三釐零
係照承平時科則而言現在除完課外運司衙門所收釐金及
沿江各釐每鹽一票約共完銀十五兩以上釐捐如是之重是
以試運楚西之鹽止能照稅鹽章程完納稅鹽每票九百斤僅
完課銀一兩八分尙且無利可圖今欲以四百斤鹽完三兩有
零之課其勢更有難行若議減釐增課則各路軍餉處處皆待
釐金接濟豈能遽爲裁減部文又稱令運使嚴禁奸商私行興
販以疏官鹽銷路查私鹽自應嚴緝究辦若因官運而概禁商
人運鹽則恐官運猶未辦成而商販轉先裹足況南鹽運本極
大籌辦官運縱有十萬兩之本尙未足以資周轉亦不能不藉

羣商之力廣爲興販開拓銷路部文又稱勸諭商民捐輸運本雖准按照籌餉例減成給獎而江北捐款林立減折上捐所在多有斷難期其踴躍部文又稱聞內地現已購備輪船七隻於此項船內撥出數隻拖帶鹽船查前購輪船尙未入江且爲水師打仗而設斷難撥爲拖帶鹽船之用至商販公雇輪船報明在案者現有四隻若歸官運卽此雇船之費已不易籌蓋淮南目下情形不患無商之可招而患無利之可獲惟有將楚西兩岸銷路大加整頓仍由運司衙門招來新舊各商運赴楚西銷售以期淮鹽逐漸進步爲得寸得尺之計前經都統富明阿奏請招商旋派知府杜文瀾前往楚北試辦如果辦有成效再當

另議章程詳辦等情具詳請奏前來伏查各軍餉絀是臣之隱
憂兩淮鹽務是臣之專政假使官運淮鹽果有大利可圖臣豈
不思竭力籌辦謀本分自然之利濟本營非常之貧無如楚西
兩岸被粵私川私侵佔太久斷非一蹴所能挽回此時必欲爭
回引地非大減賣價則不能敵鄰私非先輕成本則不能跌賣
價據現行事例九百斤一引者並鹽本稅課釐金運腳拖費計
算幾及四十兩成本已屬極重若如部議減爲四百斤之引加
爲三兩有零之課又以重價購買之輪船拖帶試行之官鹽則
成本更重安能敵鄰私而暢銷路若將各處釐金概議裁減則
下而鎮揚滁州之軍餉上而九江湖北之關釐皆將向臣處索

取而臣軍除沿江鹽釐外亦別無可籌之餉實有不能終日之勢臣悉心酌核官運雖屬良法目前尙多窒礙應暫照該運使所議俟富明阿派辦之官鹽試行有效再行另擬章程奏明辦理所有淮鹽現難改辦官運遵旨議覆緣由謹繕摺具奏伏乞

皇太后

皇上聖鑒訓示謹

奏

近日軍情片

同治二年四月十二日

再近日軍情雨花台金柱關蕪湖東西梁山各營水陸穩固均無戰事甯國附近如南湖新河莊等處涇縣附近如茂林章家渡等處均有賊蹤游弋防務尙難鬆勁然甯郡及涇縣南陵青陽各城灣沚及西河清弋江各隘水陸防守綦布星羅朱品隆在青陽亦於春末夏初屢獲勝仗保甯國之後路足以仰慰

宸廑徽郡防兵單薄是臣布置最疏之處去冬甯國之賊今春浙東之賊現在麇集於石埭太平及徽祁饒景一帶實屬防不勝防不勝剿幸左宗棠派劉典一軍沈葆楨派王沐一軍先後援徽三月十七日會克黟縣十九至二十五等日搜剿近城

之賊大破盧村黃村之賊王文瑞亦將柏溪金字牌零股一律
擊退黟祁境內甫埽羣氛而賊之竄往鄱陽者已由規田街進
逼浮梁王沐將回駐景德鎮劉典亦將馳援饒景江西之門戶
可虞而徽州之空虛尤可慮矣現調李榕一軍由北岸馳赴建
德進援祁門調席寶田一軍由湖南馳赴撫州進援徽境不知
能迅速趕到併力驅除否僞忠王自六安州解圍下竄或稱其
回救蘇州或稱其圖犯揚州裏下河或稱其糾合苗黨竄擾濱
淮各屬其確耗尙不得知然悉數東趨并未西犯鄂疆卽屬大
局之幸臣現檄鮑超由廬州追擊忠酋卽從柘皋進兵以攻巢
縣之北檄劉連捷彭毓橘蕭慶衍從迎珠塔進兵以攻巢縣之

東檄蔣凝學毛有銘由六安進援壽州並調成大吉由鄂回皖
會師壽州共討苗黨該州糧缺兵單倘能嬰城固守再過半月
各軍次第趕到合力痛剿而僧格林沁李續宜遵

旨偕來誅屢叛之逆豎保長淮之重險庶足以彰天討而定人
心除各路戰狀分案續奏外合先附陳大概伏乞

聖鑒謹

奏

恭謝

天恩瀝陳下情摺

同治二年四月二十二日

奏爲恭謝

天恩瀝陳下情仰祈

聖鑒事竊

臣

接准兵部火票遞到同治二年三月十八日內閣

奉

上諭浙江巡撫著曾國荃補授欽此當卽恭設香案望

闕叩頭謝

恩訖又恭讀

寄諭浙省係左宗棠兼轄既兼署巡撫尤責無旁貸曾國荃著仍統前敵之軍駐紮雨花台一意相機進取以圖金陵毋庸以

浙事爲念等因欽此仰見

皇上破格錄用委曲培成之至意惟是受

恩愈重報稱愈難現在髮捻紛乘苗練復叛軍情反覆世變環

生祇貽

宵旰之憂曾乏補苴之術每與臣弟國荃寓書儆惕慙悚交并

本年二月臣至雨花台大營與臣弟共處八日慨兵事之方殷

感

主恩之極渥中夜奮興互相誡勉以大局論之沿江三千里名城要隘皆爲我有加以浙東列郡蘇松各屬次第克復凡山川筋脈之地米糧百產之源該逆一無可恃未嘗不託

聖朝之威福冀功緒之可成而一念夫拓地日廣頓兵堅城戍守之卒太多游擊之軍太少師老餉竭士氣漸疲羣盜如毛飢餓四竄竊號之寇未滅流賊之患或興則又爲之蹙頞欷歔愧臣兄弟謬當重任深恐上辜

君恩下負民望遂陷於大戾而不自知憂灼之餘每思避位讓賢稍分責任又不敢數數陳奏上瀆

宸聰上年正月間臣密陳金陵未克以前不再

加恩臣家誠以功名之際終之始難消長之機盈則必缺會蒙

寄諭嘉許俯鑒愚忱臣弟國荃旋擢藩司已叨非分今又特沛

恩綸授以開府之榮專其治軍之責聞

命而後已閱兼旬臣與臣弟兩次函商欲固辭則頗涉矯情思
立異於當世欲受事則不自量力懼貽譏於方來再四躊躇誠
恐治軍無效傾覆尋至不如少安愚拙之分徐圖尺寸之功惟
有顛懇

天恩收回

成命俯准

臣

弟以開缺藩司效力行閒與

臣

隨時熟籌戰守相

機進取或者以勤補拙以恐致福迅克堅城殄除醜類稍答

高厚鴻慈於萬一除由

臣

弟國荃專摺瀝陳外所有微臣感激

下忱理合繕摺叩謝

天恩伏乞

皇太后

皇上聖鑒謹

奏

謝曾貞幹予謚建祠

恩摺

同治二年四月二十二日

奏爲恭謝

天恩仰祈

聖鑒事竊

臣接准江蘇撫

臣

李鴻章咨稱同治元年十二月三

十日內閣奉

上諭前據曾國藩奏知府曾貞幹積勞病故當經降旨追贈按察使銜照按察使軍營立功後病故例議卹茲據李鴻章奏報曾貞幹力疾督戰情形並臚陳生前戰績懇請逾格優卹一摺已故知府曾貞幹隨同伊兄曾國藩等從事戎行治軍有紀律善拊循戰士履危蹈險堅固不搖咸豐十年克復太湖縣城十

一年克復安慶省城本年肅清江北各城進圍金陵皆曾貞幹之力居多七八月閒大股援賊數十萬人圍撲雨花台大營屢爭官軍餉道該故員從容布置防勦兼施力戰苦守四十餘日使賊卒不得逞被創遁去乃因在軍日久勞苦憂思遂致一病不起以死勤事實屬可嘉可憫曾貞幹著加恩照二品例議卹並准其予諡於本籍及死事地方建立專祠仍宣付史館特予立傳以彰忠蓋欽此聞

命之下感泣難名當卽恭設香案望

闕叩頭謝

恩訖伏念臣弟貞幹本無遠略夙抱愚忠十載從戎未酬掃穴

擒渠之願九原齋志空懷渡河殺賊之心仰蒙

褒贈臬司優卹後嗣已沐逾恆之典實爲曠代之榮重壤增輝
結草不足伸其報闔門銜感臥薪無以表其誠乃撫臣李鴻章
相距較遠聞信稍遲復具疏而上陳荷

恩綸之再賁既增秩以崇班聯更易名以表行誼建祠兩地忝
附馨香俎豆之林列傳千秋永垂神化丹青之業死而有知感
將何極臣自愧庸愚久膺艱鉅下懷季弟未償之志上戴

聖主不次之恩惟有率同臣弟國荃誓殲醜類規取土疆嘗膽
以圖功側身以修行兢兢業業冀竭涓埃報荅之忱子子孫孫
無忘

高厚生成之德所有微臣感激下忱謹會同浙江撫臣曾國荃

恭摺叩謝

天恩伏乞

皇太后

皇上聖鑒謹

奏

克復東關銅城閘兩隘摺

同治二年四月二十七日

奏爲水陸各軍會克東關銅城閘兩隘恭摺馳陳仰祈

聖鑒事竊自僞忠王李秀成在六安州解圍下竄鮑超跟蹤追擊卽從柘皋進兵以攻巢縣之北劉連捷彭毓橘蕭慶衍等從迎珠塔進兵以攻巢縣之東臣國藩於四月十二日附陳大概在案惟是欲圖巢縣必先力取東關銅城閘以毀其門戶初五日臣玉麟商令蕭慶衍彭毓橘等專攻銅城閘派水師曾泗美會合劉連捷毛有銘專攻東關踞東關者爲僞閩天安蕭逆高壘深溝擁眾堅守劉連捷知該隘之未可力爭也乃於初六日夜令師船由蠡子口潛渡陸軍緣堤埂而進伏於九峯山下另

派譚國泰帶勇士數十人從東關近處以木盆偷渡毀柵越濠
突逼壘下肉薄而登賊以礮石外擊密若飛蝗胡德雲石太和
從煙燄中駕梯直上中礮死之劉連捷遂督副後南後兩營奮
力繼進曾泗美從水路列礮環轟聲徹霄半壘賊惶遽欲遁九
峯山下伏兵齊出合軍衝殺立破石壘遂於五更克復東關黎
明七陳村打鼓山南水坳之賊一齊來援劉連捷合譚國泰守
定石壘親率副後等營迎敵毛有銘率湘右等營由九峯山斜
刺而入賊乃卻走我軍以賊未受創必將復至遂於石壘之旁
增修一壘以爲犄角嚴陣以待之俄報賊又從林頭鎮吳家村
揚隊而來毛有銘隨合葛清泰向南水坳進自率湘右營繼之

劉連捷令李瑞二向打鼓山進自率副後營繼之王載駟向九
峯山進劉秉珩向七陳村進分道並進搏鬪移時王載駟等聞
南水坳打鼓山之兵已將得手卽帶部卒搶上九峯山曾泗美
率舳板從河曲中出斷賊歸路擒斬甚眾盡焚各賊卡賊館而
還此四月初七日攻克東關并擊退援賊之情形也其陸師之
分攻銅城聞者蕭慶衍彭毓橘等軍於初六日由黃墩渡河過
八角廟下寨會約喻俊明成發翔張錦芳唐敏義水師四營奮
攻一日夜賊但堅修老巢伏匿不出并於南北兩街各添四壘
爲負嵎死守計時值河水泛溢圩田皆成巨浸臣玉麟於初七
日令喻俊明成發翔等鑿開土埂師船從決口駛入南北兩圩

直薄賊巢之下更番擊之初九日各軍會商畱彭毓橘所部扼
守八角廟分蕭慶衍所部移勦百旺市五顯集一帶先清銅城
閘之後路分軍爲三百旺市接戰正酣三汊河雍家鎮兩支亦
至遂將兩處卡壘一律平毀振旅而旋水師之入南北圩者乘
勢猛攻環賊壘之三面皆有舢板小划拋擲火毬陸軍亦萬槍
齊放五更時踰毀南街土壘遂攻破銅城閘一隘駢尸塞道幾
無脫者而林頭鎮另股亦旋爲水師擊走此四月初十日續克
銅城閘之情形也臣等查賊踞北岸以巢縣爲根本以東關銅
城閘爲屏蔽橫據重險賊計甚堅仰賴

聖主威福將士同心數日而下兩隘從此鮑超攻其北劉連捷

扼其南蕭慶衍彭毓橘圍其東巢縣必有可克之機此次力戰陣亡之藍翎千總彭勝華藍翎把總曾彩雲把總胡德雲石太和等應請

勅部從優議卹以慰忠魂所有水陸會克東關銅城闡緣由謹繕摺由驛五百里馳奏伏乞

皇太后

皇上聖鑒訓示謹

奏

十

中

以忠點也言水與會東則水與會西則

中

以忠點也言水與會東則水與會西則

以忠點也言水與會東則水與會西則

近日軍情并陳餉絀情形片

同治二年四月二十七日

再近日軍情大江南岸雨花台各營堅守如常蕪湖甯國南陵
數城金柱關灣沚西河數隘水陸布置防務尙鬆涇縣守將易
開俊於四月十八日在章家渡擊賊大勝朱品隆亦在青陽境
內擊賊屢勝徽州自王沐回駐景德鎮後賊又從太平竄入歙
縣之許村唐義訓督軍擊卻追出箬嶺前調李榕南渡一軍十
九日進攻建德未下二十三日再戰克之臣檄令進攻彭澤鄱
陽會合韓進春席寶田等軍由內打出冀埽上游之羣賊而保
江西之完區大江北岸自忠酋下竄賊勢漸衰我軍攻克東關
銅城聞劉連捷進紮望城岡彭毓橘進紮巢縣東門水陸攻擊

一晝夜遂於二十二夜克復巢城現檄鮑超與蕭慶衍彭毓橘
劉連捷諸軍進取和含二浦直達九洑洲冀驅賊併歸南岸較
易勦辦苗沛霖圍攻壽州已逾一月城中僅有五百人絕糧者
八日署知州毛維翼與民苦守可嘉可憫蔣凝學於十六日自
六安援壽甫抵謝埠又爲羣捻所阻毛有銘自東關援壽以無
餉可領軍行稍滯成大吉自麻城援壽亦以餉缺未能成行今
年兵事之遲鈍半由於餉需之奇絀臣部八萬餘人益以李續
宜部下一萬人欠餉多者十五箇月少亦八九箇月昨鮑超自
樅陽登岸苦無途費其部卒逃散一千餘人毛有銘自東關起
程其部卒逃散數十人并據將倡逃之將弁鄒慶星等稟請參

革臣帶兵九載今年始有餉匱兵逃之事從前徽甯兩防每月額餉二十萬皆由浙江供支臣接辦以來庚辛二年奏撥江西漕折每月五萬至壬戌年奏撥四萬奉

旨允准旋經撫

臣

沈葆楨奏畱供本省防兵之用戶部議准而

臣所統徽甯兩防遂無一毫可恃之餉矣江西通省釐金臣指

定河口景鎮等卡協濟左宗棠月約三萬兩指定吳城等卡協濟彭玉麟月約二萬數千又撥給本省水師劉于濬孫昌國兩軍月約二萬數千四處共支去八萬而實解臣台者遂無幾矣

湖南東征局釐金今年因米價昂貴畱楚買米而現銀解皖者亦無幾矣廣東釐金奏定專充皖浙軍餉近亦有畱供本省之

議臣力小任重統軍過多每月需額餉五十餘萬而入款不過
 十餘萬不敷之數甚鉅且唐訓方近駐臨淮李世忠近駐滁州
 索餉之文月凡數至即赫德所購輪船指日可到亦必向臣處
 索餉昔以數人分辨之軍務今專責於一人昔以各路分籌之
 軍餉今併萃於一身夙夜祇懼恐微臣之顛踣立見而大局之
 決裂尤可虞也臣在軍多年從不敢輕上請餉之奏蓋不欲以

危詞上煩

聖聽又不欲以苦語渙散軍心茲因有勇丁逃散之案不得不
 據實密陳可否顛懇

天恩在於九江洋稅項下每月撥銀三萬兩解皖濟餉出自

鴻施仍懇

勅下廣東督撫將釐金全解皖浙本省不得截留大局幸甚臣
忝任江督已滿三年前二年事機稍順去夏至今變故紛乘幾
蹈大戾目下風波雖定憂悸未忘誠恐積日累年更無成效仰
祈

皇上天恩特派大員來南於

欽差大臣兩江總督二篆之中分縮一篆俾臣責任略輕稍釋
惴慄之懷臣昨專差進京與臣弟國荃并辭浙撫之

命亦因識淺才疏恐妨賢路均祈

俯鑒愚忱次第允准不勝感激悚切之至理合附片密陳伏乞

金陵軍攻克石城石壘摺

同治二年五月十二日

奏爲官軍攻破雨花台僞城及聚寶門外諸石壘恭摺馳陳仰

祈

聖鑒事竊僞忠王李秀成自六安戰敗率眾東竄紛傳將回救蘇州江蘇撫臣李鴻章函商曾國荃囑其力攻上游以分賊勢無令忠酋得以全力援蘇曾國荃以忠賊回援蘇州固屬可慮卽直犯揚州裏下河尤爲可虞計莫如急爭金陵老巢以攻其所必救使城中之賊不暇遠趨蘇郡而北岸之賊亦不敢專注揚州乃於四月二十七日宣諭各軍多備攻具先登者上賞退後者必誅漏甫二下齊隊出濠六路併進每路以一營爲前鋒

兩營爲策應令李臣典趙三元武交清等專攻雨花台石城趙
清河黃東南攻聚寶門外南卡石壘晏澧週易春光攻西卡石
壘何玉貴張詩曰楊西平攻東卡石壘又令陳澍率李定元朱
文光羅景集等出中路應之蕭孚泗率蕭致祥李泰山胡松江
等出右路應之易良虎禹志連等出左路應之前鋒各營於三
更時匍伏蛇行偷近石城石壘東草填濠架梯欲上賊遽驚覺
燃礮外擊我勇中礮而踣者五人眾勇辟易李臣典立斬二卒
搴旗直前軍中無敢少後者羣以火箭火毬盤空飛擲悉入石
城天漸嚮明趙三元率中軍親兵從礮台下蟻附而升李臣典
武交清各率部卒從中右兩路肉薄齊登維時敵樓火發賊方

爭相奔救不料煙霾中人聲鼎沸亂鋒交下我軍已奪僞城一座該處地高勢險俯瞰東卡西卡南卡九石壘歷歷在目旋見趙清河黃東南晏澧週何玉貴等乘勢猛擊平毀數壘餘卽棄壘竄遁蕭孚泗易良虎陳湜縱軍圍剿將賊追過長干橋蹙偏入水者無數曾國荃以雨花台地段遼闊近接城闔賊必與我爭此要害乃抽四營駐守石城增修六新壘以接各舊營之氣並調集後路各營以待之未幾城賊出大股潛匿附郭屋舍中以誘敵各軍蓄銳不發俟賊少懈突出奮擊蕭孚泗陳湜易良虎扼其前趙三元趙清河黃東南晏澧週易春光伍維壽等截其後賊不得逞遂繞雨花台乘我新營未定悉銳猛攻抵死不

退李臣典趙三元武交清張詩曰等督隊馳援黃潤昌成東昂
等亦引軍來助搏鬪移時賊乃負創入城是役也俘執逾二百
名殲戮近六千人奪獲礮械尤多軍士亦小有傷折臣查雨花
台及金陵南門外各石壘據險雄峙屏蔽城垣昔年和春張國
樑等屢攻未下茲賴

聖主威福諸將同心克此堅壘不特可分蘇揚之賊勢亦於偪
勦金陵深有裨益此次首先登壘戰功最著之提督銜記名總
兵李臣典請

交軍機處記名遇有提督缺出請

旨簡放記名總兵晏澧週請

簡授總兵實缺並

賞加提督銜副將趙三元武交清趙清河何玉貴黃東南伍維壽均請

交軍機處記名遇有總兵缺出請

旨簡放其餘出力人員可否附於巢含和案內容臣開單保奏
出自

恩施陣亡各員弁查明另案請卹所有官軍攻克雨花台等處
石城石壘緣由謹會同大學士湖廣督臣官文江蘇撫臣李鴻
章由驛五百里具奏伏乞

皇太后

皇上聖鑒訓示謹

奏

水陸會克巢含和三城摺

同治二年五月十二日

奏爲水陸各營會克巢縣含山和州三城恭摺馳報仰祈

聖鑒事竊自官軍疊克東關銅城聞後遂由望城岡攻復巢縣

臣國藩於四月二十七日附陳大概在案先是銅城聞旣克劉

連捷與蕭慶衍彭毓橘謀欲取巢縣必自進兵望城岡始十六

日劉連捷率所部各營會合彭毓橘陸師成發翔水師分道並

發行不數里詎知筓箕山麓伏有賊股劉連捷恐爲所乘姑駐

軍以觀其變俄而賊已大至一枝由陳村來一枝由斬龍岡來

旌旗迷目布滿原野我軍整隊禦之賊恃眾悍往來猛撲數次

互有損折旋分賊騎掠陣而過劉連捷知有狡謀麾兵稍退賊

已半鈔後路適礮艇連檣駛至彭毓橘亦帶馬步六營從斜徑刺入三路合圍擒斬頗眾劉連捷乘賊戰敗遂於筲箕山搶築營牆彭毓橘驅賊至七八里外仍回駐迎珠塔下十八日蕭慶衍率師來會遂於十九日進次洪家山輕騎至望城岡履勘形勢遙見賊於巢湖口岸跨水爲壘水際密排賊划阻我進兵之路成發翔曾泗美會督澄海清江左右四營決開圩埂灌水入圩更鑿圩內大隄將移舢板以入巢湖賊乃增壘塞隄百計撓我卒不得逞二十日蕭慶衍劉連捷兩軍拔赴望城岡未及下寨賊卽擁眾渡河成發翔俟賊半渡令各水營由決口飛槩進圩由圩達湖鈔過賊後賊方逡巡卻顧我舟師已橫截圩中萬

礮齊轟斷其歸路成發翔曾泗美等又分水勇乘勢登陸四出痛勦賊酋蕭主將梟悍絕倫左營裨將李宏試縛而斬之羣賊奪氣不知所爲我軍水陸交攻襲破二卡一壘壘中壘外積尸若阜罕有脫者此四月十六日大戰笱箕山二十日偪紮望城岡堵勦獲勝之情形也望城岡旣紮定則巢縣之南賊無竄路陸師可薄城而營水師亦可繞湖而陣二十一日彭毓橘由迎珠塔拔隊進紮東門外之審廟地方蕭慶衍撥軍護之次日水師成發翔唐敏義從南隄入五聯圩轉攻西門張錦芳攻五聯圩隄上之石卡曾泗美喻俊明同攻東門石壘並約陸師彭毓橘移逼城根揚隊搦戰賊據城壘矢石交下我軍且卻且前相

持竟曰二更後水師環隄猛擊悉焚湖中賊划毀其浮橋火毬
橫擲入壘火箭飛射入城喧聲鼎沸劉連捷亦自河南飛騎馳
至共破密廟沿河六石壘壘賊競向東門進城曾泗美喻俊明
卽躡蹤從東門而入成發翔等從南門攻入適鮑超亦派數營
自廬郡西來遂於二十二夜克復巢縣二十三日鮑超由柘皋
督軍出清溪鎮擊賊勝之略地而東是晚蕭慶衍亦截尾賊於
林台圩旋合劉連捷彭毓橘等營渡河前進於二十四日與鮑
超會師含山而賊已宵遁鮑超蕭慶衍等以賊去未遠星夜往
襲和州比入州境天甫曙也但見賊旗靡亂不絕於道而水師
成發翔約駐泊鍼魚觜之楊占鼇已駛入和州港內城賊逃遁

不及半聚壘中鮑超蕭慶衍與水師環壘急攻賊大怖出壘乞
降盡釋脅從者而斬其頭目以徇於是各整部伍入城少息所
獲遺穀甚多此二十二日攻克巢縣二十四五等日連復含山
和州之情形也臣等查賊渡北岸由和州而含山而巢縣力爭
要地堅踞數月意將西竄鄂省北犯淮甸掣動上游之全局冀
解金陵之重圍幸仗

天威大彰撻伐四日之內壘下三城從此進取江浦九洑洲或
可翦其枝葉圖拔金陵此次苦戰數月記名提督江南京口協
副將成發翔功績最偉應如何優加獎勵之處恭候
聖裁按察使銜記名道彭毓橘請

賞給勇號記名提督蕭慶衍請

賞給提督應得封典記名總兵張錦芳副將李宏試均請

賞給勇號副將曾泗美請

交軍機處記名遇有總兵缺出請

旨簡放總兵銜副將劉長槐朱吉玉趙太和均請以總兵記名

請

旨簡放并

賞加提督銜副將唐敏義請

賞加總兵銜其餘出力人員容臣等查明擇尤酌保籲懇

恩施以資鼓勵至力戰陣亡之花翎副將銜參將陳邦榮楊繼

隆傳堂春花翎游擊鄭楨祥藍翎游擊劉春福都司丁文彬藍翎守備張彪藍翎外委屈傳芝顏隆許李連勝及因傷身故之花翎副將黃福田花翎游擊潘宏勝二員均請

勅部分別從優議卹所有官軍水陸會勦疊復三城緣由謹繕摺由驛五百里具陳伏乞

皇太后

皇上聖鑒訓示謹

奏

軍十知縣請不職

軍大臣

軍大臣

軍大臣

軍大臣

軍大臣

軍大臣

近日軍情片

同治二年五月十二日

再近日軍情南岸曾國荃一軍自克雨花台石城及南門外各壘後汛地愈廣防兵愈單抽調金柱關守兵千人移紮金陵又調回彭毓橘一軍回顧老營仍留劉連捷步隊楊鎮南馬隊隨同鮑超進攻江浦九洑洲等處其蕪湖金柱關甯國灣沚西河東西梁山青陽南陵池州一帶節節布置均尚穩固五月初三日太平石埭之賊分竄茂林涇縣守將易開俊督隊迎剿殲斃盈千徽州自四月肅清後近無戰事其竄江西之黃文金等股在鄱陽浮梁境內屢爲官軍所敗現在斜趨都昌湖口等屬李榕一軍於端午日破賊於彭澤之項家山初七日進援湖口綜

計饒州九江各屬水路有劉于濬孫昌國左光培丁義方等營
陸路有段起李榕席寶田王沐韓進春等營而劉典又自徽州
赴饒聞江忠義亦將自湖南赴潯水陸兵力會萃數萬當可驅
賊出境不使深入腹地矣苗逆攻圍壽州繞城築壘數十座周
以長濠城西濱淮一路環列礮船帆檣如織蔣凝學毛有銘援
壽之師於四月二十七日進紮九里溝二十八日之戰雖破牛
尾岡三壘而我軍傷亡頗眾官弁陣亡至二十四人士氣稍沮
臣已飛催成大吉由湖北迅赴三河尖爲西路之援應並檄周
寬世由桐城馳赴六安分紮州城及謝埠馬頭集保蔣凝學等
之後路又以長淮千里並無得力水師飭派李朝斌帶太湖師

船十營赴滬調現駐滬上之黃翼升帶淮揚師船六七營由洪澤湖入淮一則各歸本汛仍符奏設水師之初議一則駛至五河以上掃清滄渦淮肥汝潁諸巨川俾苗逆不得盡收水濱之利惟壽州城中僅五百饑疲之卒無升斗續進之糧累月苦守危在旦夕赴援之陸師既不能併力衝入續調之水師又不能剋期來會誠恐要地難保無以慰州牧毛維翼等倒懸之望憂灼之餘彌增愧歎除各路戰狀分案續報外合先附陳梗概伏乞

皇太后

皇上聖鑒謹

攻克江浦浦口九泐洲江面一律肅清摺

同治二年五月二十七日

奏爲水陸各軍會克江浦浦口二城草鞋夾燕子磯等數隘并力破九泐洲一關江面一律肅清恭摺馳報仰祈

聖鑒事竊自巢含和三城相繼攻克旋破雨花台等處石城石壘臣等於五月十二日陳奏在案厥後鮑超與蕭慶衍劉連捷等在和州息軍數日正擬席捲東下疊據探報賊中以雨花台連破石壘恐官軍大舉攻城又以崑新旣克恐滬軍大舉圍蘇李秀成與諸僞王紛紛改圖議由江北返援近救金陵遠救蘇州於是天長六合來安等處次第解圍羣醜南渡而賊之分踞橋林小店者亦於五月初五日冒雨掠舟紛紛搶渡江面人聲

喧闐不絕蕭慶衍度江浦浦口各賊股將無固志矣乃遣騎隊襲之行未中途聞浦口之賊先已棄城遁走江浦之賊獻書詣營乞降鮑超劉連捷察知其詐於初九日引軍疾進蕭慶衍出烏江與各水營會師約戰適李朝斌統太湖水師將赴滬上亦於是時道出金陵初十日李朝斌派部將鄔桂芳李助發江福山等師船由大江衝卡先駐浦口以扼忠酋餘黨之未渡江者臣玉麟自率定湘澄海清江三營臣岳斌自率親兵左後護衛等營並調正中副後副右親兵前四營同入內河詎師次江浦而賊又聞風宵遁遂會合陸師將江浦浦口一併收復仍沿途追勦鈔過逃賊之前賊正竄併九洑洲洲上僞城之賊不納我

舟師截江圍擊賊不得渡爭向蘆葦中駭竄不知叢葦密處水深丈許或數丈昔道光年間備夷之濠張國樑禦賊之濠又羣賊歷年添修之濠溝港縱橫人馬紛逐一蹴卽溺死者駢積以數萬計至十一日餘賊飢啼江邊旣爲新開河所隔不得仍回北岸又爲大江所阻不得徑渡南岸各水師分隊登陸盡日輪攻撿刃就戮者半墮江自沈者半惟新中營副將鄔桂芳飛槳前驅徑奪洲隘中礮死之此五月初十日克復江浦浦口兩城之情形也二浦旣復我軍將有事於九洑洲曾國荃乘夜至新江口與臣玉麟臣岳斌會勘該洲在驚流急湍之中高峙僞城巨礮層列對岸有攔江磯中關諸石壘又有草鞋夾下關七里

洲燕子磯十數堅壘賊艦賊划與爲倚護斷非陸師所能飛越亦非水師所易猝攻計莫如先取南岸數隘庶撤其藩籬而九洲洲乃有下手之處十二日派丁泗濱許雲發楊明海胡俊友等四營爲頭隊從下關進派喻俊明唐敏義陶樹恩嚴定國羅宏裕楊占鼇等六營爲二隊從草鞋夾進更派彭楚漢傅敏才顏海仙張錦芳等爲三隊以應之臣岳斌仍與李朝斌往來督戰臣玉麟親督成發翔任星元兩營據九洲洲上流作欲攻不攻之勢使洲賊不暇兼顧南岸調派既定十三日天未嚮明丁泗濱喻俊明彭楚漢等乃循南岸飛駛而下將逼賊巢賊竟萬礮齊轟猝不得近其壘我軍預以枯荻灌油縱火江上先焚其

舟數百賊艦一時俱燼眾勇乘勢薄壘有緣牆而上者有從礮
眼中搶險而入者遂平下關草鞋夾八賊壘移師轉向中關該
關內倚小河外濱大江水流箭急師船不能上駛胡俊友舍舟
遵陸突出壘下方將一躍而登忽爲槍子洞腹遽殞於陣陶樹
恩許雲發憤極搏戰復裹重創士卒亦損折過眾回軍暫息乃
於次日分兵襲破燕子磯殺賊毀壘而還此十三十四等日屢
克下關草鞋夾燕子磯三隘之情形也先是臣岳斌詢諸土人
知江濱叢莽中有隄埂一道可達九洲賊濠之外至是商令
陸軍劉連捷楊鎮南數隊由隄埂缺處鳧水而進派彭楚漢傅
敏才顏海仙三營從洲尾攻上派張錦芳成發翔任星元三營

由洲頭攻下派喻俊明唐敏義嚴定國等及李朝斌所部之李
助發周正林江福山等營各駕舳板繞洲奮擊另飭丁泗濱羅
宏裕楊占鼇等由南岸分領水師直趨中關十五日昧爽兩岸
並舉人人皆殊死戰賊之在中關者自恃附城爲壘卒不稍動
其堅踞九洲者下有賊划上有僞城千礮環轟片刻不息又
於東西南三路分伏洋槍悍隊伺閒出擊損我精銳幾不可以
數計彭楚漢唐敏義負創角戰誓得此隘而甘心戰至日晡賊
少怠矣乃於初更時謀之成發翔喻俊明顏海仙張錦芳等乘
月色昏暗中移船潛近賊壘會西南風大作眾軍以火箭攢射
立焚水中拖罟數隻風引火猛燃及洲上卡房喻俊明李朝斌

麾軍直上成發翔任星元張錦芳在左彭楚漢顏海仙唐敏才
在右各率弁勇大呼升岸丁泗濱亦自中關鼓槳而來躍過重
濠肉薄齊登前鋒旣殪後者更進踰者被戕踐尸復登竟以二
更後越牆撲入聚殲羣醜無一脫者遂奪九泐洲僞城一座并
獲大礮數百尊牛馬旗械無數此又十五日力克九泐洲之情
形也臣等查九泐洲爲大江關鍵與金陵相犄角實逆首所必
爭之地幸賴

天威震疊奪此要隘北岸盡爲我有長江一律肅清從此圍攻
金陵較有把握諸將士酷暑鏖兵血戰至五晝夜之久傷亡至
二千餘人之多實亦可嘉可憫此次尤爲出力之提督銜浙江

定海鎮總兵喻俊明浙江黃巖鎮總兵丁泗濱記名總兵彭楚漢楊明海均請

交軍機處記名遇有提督缺出請

旨簡放彭楚漢一員臣國藩曾於堪勝水師總兵案內特保應

請

先擢總兵實缺記名提督浙江處州鎮總兵李朝斌因赴滬之便竭力助攻應如何

加恩之處恭候

聖裁記名提督江南京口協副將成發翔前於克復巢縣案內推爲首功此次應如何酌獎仍候

聖裁總兵銜副將楊占鼇李助發嚴定國副將顏海仙羅宏裕
傅敏才周正林李宏試均請

交軍機處記名遇有總兵缺出請

旨簡放楊占鼇並

賞加提督銜李助發顏海仙羅宏裕傅敏才並

賞給勇號記名總兵張錦芳請

賞加提督銜已保總兵銜副將唐敏義請

賞給勇號副將銜參將許雲發陶樹恩均請以副將儘先補用
並

賞給勇號許雲發並加總兵銜游擊江福山請以參將儘先選

用並加副將銜其餘出力人員可否由臣等專案奏獎出自
天恩至總兵銜副將鄔桂芳副將胡俊友力戰捐軀深堪憫惻
均請照總兵陣亡例從優

賜卹以慰忠魂此外陣亡各員弁容俟查明彙案奏卹所有官
軍克復各城隘及九洑洲緣由謹會同大學士湖廣總督臣官
文江蘇巡撫臣李鴻章浙江巡撫臣曾國荃恭摺由驛六百里
具奏伏乞

皇太后

皇上聖鑒訓示謹

奏

近日軍情片

同治二年五月二十七日

再近日軍情壽州一城苗逆圍攻如故蔣凝學毛有銘等於五月十三日毀東皋峰逆壘數座該逆續調悍黨增修多壘意在以長圍久困城內米糧久罄殺馬食士聞苗黨有夜棹小舟運麥八石以濟城中者可知從苗之心亦不甚堅臣現檄周寬世四營紮迎河集及四十里鋪保蔣凝學等之後路成大吉於十四日在麻城之宋埠拔隊亦令併援壽州以厚兵力其濱江一帶自九洑洲攻克後畱蕭慶衍駐江浦浦口以固北岸之防派鮑超渡江進紮孝陵衛以合金陵之圍十四日吳坤修萬化林等水陸勦賊破楊四渡六壘王可陞何紹彩周萬倬等併在襄

公渡雁翅斗門連破七壘遂收復金寶圩距蕪湖金柱關百里
內已無賊蹤西河灣沚各防亦均穩固甯國守將劉松山先於
初八日赴涇縣與易開俊會剿灣灘大坑之賊獲一勝仗十六
日僞襄王奉王等股一由章家渡擾及丁村一由大坑逼犯涇
縣易開俊分隊出擊力戰卻之其青陽守將朱品隆旣破梅林
兩卡又毀陵陽鎮四壘直薄石埭城下屢攻未克回軍仍駐青
陽徽州嶺防近無戰事饒州景德鎮一帶劉勝祥於十二日獲
一勝仗劉典席寶田於十四十五日各獲勝仗李榕抵湖口後
因病卒太多賊勢太眾尙未接戰俟江忠義到湖口與饒軍兩
路并進江西各賊股必可悉就驅除臣當檄江忠義李榕席寶

田等各率所部自石太漸進東壩則攻取金陵老巢較有把握
矣然金陵城大賊眾諸酋曰眷屬資財萃聚於斯洪逆老於戎
事又畱僞忠王不援蘇州共守金陵斷無輕棄之理必須力斷
接濟仿照昔年攻九江安慶之法嚴防江路禁截賊糧則百餘
里之城數十萬之賊專恃肩挑陸運勢必不給數月以後當有
因飢內訌之事查前此長江上下輪船與紅單師船均不免暗
中濟賊除紅單船一項由臣設法查禁外輪船往來剽疾稽察
尤難應請

旨勅下總理衙門照會英法各國公使於金陵未克以前不得
在該城外停泊輪船庶該逆城孤糧絕不至又成持久之局所

有近日各路軍情合先附陳大概伏乞

聖鑒訓示謹

奏